

四庫全書

集部

欽定四庫全書

椒邱文集卷三十一

明 何喬新 撰

墓表

節婦劉氏墓表

嗚呼女教之墮久矣江漢汝墳之風不復見於世矣有  
若節婦劉氏者生於教弛風頹之餘孀居三十餘年貞  
潔之行如一日可不謂賢矣乎節婦諱除維吉其父易

氏其母也世為廣昌望族節婦幼有淑質組紃縫製不煩姆傅而工既筭為處士吳公世昌之妻事舅姑撫膝侍罔不中度居數歲處士君有疾纏綿衽席垂二載節婦蚤夜侍湯藥備殫勤瘁無少怠處士君自度不支謂節婦曰吾累汝多矣吾死汝無壯子將若何節婦泣曰婦之從夫有死無二君苟不諱妾敢有他志耶已而處士君卒節婦時年二十有八一子尚呱呱節婦哀毀幾不能生斂之日拔髮納棺中誓靡他俄而子又死節婦

痛之甚啗其臂既葬處士君穿穴墓傍欲自縊相從於  
地下舅姑知其必死慰勉之曰汝自為謀則善矣其如  
舅姑老何節婦感悟乃強自寬躬自節約以養舅姑鄉  
閭稱其節孝舅姑憐其無子命以處士君弟世旺之子  
仁傑為嗣初仁傑方在娠處士君降於巫語節婦曰吾  
弟之子即汝子也其臂猶有汝之齒痕及生視其臂果  
然節婦撫育仁傑不啻己出仁傑亦孝養備至如實生  
己景泰元年冬節婦年已六十矣知廣昌縣事新安江



侯浩具奏節婦志行無玷請加旌表以勵風俗事下禮部移文覈實未報明年三月十四日節婦以疾卒又明年六月禮部請旌表如式詔旌其門曰吳世昌妻劉氏貞節之門且復其家又明年十二月廿四日仁傑奉節婦之柩葬於郭頭嶧孫男六曰德曰徵曰某曰循曰衛曰微孫女三長適黃璫次適李祥次適李成仁傑致隆所後買附郭田二十畝俾其子孫歲收其租以供處士君與節婦寒食祭掃之費且盟於族曰後世子孫有侵

此田而怠其祀者宗族共斥之又磐石置墓前請予表之嗚呼先王盛時所以教於閭閻者備矣居有姆出有傳養其德有樂歌其行而尊其志有詩然猶有凱風不安其室者出於其間況於後世乎而節婦卓然如此既全其節又延其嗣生也鄉閭稱之歿也朝廷旌之真可謂賢也已嗚呼彼錦衣象掃者孰非人婦哉孰非人婦哉予故表之以勸為人婦者

明故中順大夫福建按察司副使辛公墓表

成化九年冬十月三日福建按察司副使襄城辛公以疾卒於家是歲十二月四日其孤耕與其壻高瑁葬公龜山先塋之次葬後五年子遷湖廣布政使道襄城過其家弔焉耕奉公行狀泣而請曰先君葬已久而墓石無文懼無以昭德垂遠惟先生圖之噫公予之畏友也其奚辭按狀公諱訪字咨道其先本魏侍中毗之後世家真定之陽曲曾祖父敬避亂徙許之襄陽城遂占籍焉祖諱達以子貴贈承德郎戶部主事考諱謙以公貴

封文林郎四川道監察御史母蔚氏贈太孺人公自少  
端重不妄語笑年七歲父兄授之書不數過輒成誦巡  
按河南監察御史趙公遇諸途奇之召補邑庠弟子員  
公篤志問學文詞典瞻邑之耆宿皆器重之正統丁卯  
以詩經中河南鄉試第三名景泰辛未登進士第觀政  
吏部益務進學公退未嘗釋手時予先公為吏部尚書  
好誘掖後進一日召諸進士試之命題以光武賜隗囂  
書唐人送李愿歸盤谷序公所作詞理淵永先公亟稱

之會都察院御史員缺詔吏部選進士勤慎者補之先  
公曰勤慎莫如辛進士者遂擢廣東道監察御史糾隱  
繩違克振憲度康定皇帝念西北邊兵戍守良苦勅公  
賫金帛往勞之先時使者憚臨邊不親致賜故將校多  
侵尅賜物者公馳至延綏榆林召集成卒稱詔慰勞而  
賜之人人皆霑上恩丁孺人憂解官居喪足不踐公門  
服闋赴京同儕多願居輦轂下以便進取公自言親老  
願官南臺以便養家宰王公賢之改南京四川道益以

廉慎自持風裁凜然都御史蕭公深重之獄之疑者多以屬公都憲軒公督南京糧儲持法甚嚴御史鮮當其意者獨賢公且曰吾老矣堪代我者惟子而已天順己卯秋應天府開科取士蕭公命公監試主司欲取其所親衆以主司官翰林不敢言公厲色曰大比興賢顧可徇私耶主司赧然而止遷浙江按察司僉事抵任錢塘仁和二縣循故事具供張什物送官舍公悉却之或以故事為言公曰辭受惟其當而已何必拘故事也處州

頑民聚徒千餘盜採銀礦衆議發兵討之公曰兵刃既接必有死於無辜者乃揭榜諭以禍福衆皆歡呼而散公暇輒詣學宮進諸生講論經史金華舊有麗澤書院以祀呂成公歲久寢圯公命有司新其祠宇又以何文定公基王文憲公柏金文安公履祥許文懿公謙承朱文公之正傳奏請立祠鄉邦春秋致祭以風厲學者祠廬大姓連姻權貴怙勢恣橫部使者莫敢誰何公獨捕治之當道交屬且脅以危言公竟抵之法由是忤權貴

意有薦公者輒沮之刑部侍郎曾公訪察浙江諸司以  
不職黜者甚衆獨稱公廉能力薦於朝陞福建按察司  
副使奉勅巡視海道瀕海大姓私造海艦歲出諸番市  
易因相剽殺公捕其渠黨而寘諸法沒入其艦事連達  
官窮治甚急其家訟於御史誣公激變良民或勸公稍  
緩其獄公奮然曰吾寧執法而死不忍賣法而生也自  
是奸民屏息海道肅清未幾文林公卒公聞訃號慟幾  
絕即解官北歸寮友致賻皆不受既襄事負土築墳手



種松柏有助之者輒辭曰人子所當盡也嗚呼公之行  
治如此然官終四品年僅四十有八不獲大用以究其  
志此君子所為痛悼也公先娶王氏封孺人繼娶邢氏  
男五長即耕次曰耘曰耒曰植曰溉女五長適高瑁次  
適許某王恬吳溥田珣公恬淡寡慾官南臺時未有子  
或勸之買妾公謝曰吾妻已產女矣安知終無男耶居  
官二十餘年常祿外一芥不取於人其自閩奔喪也延  
平太守與公同年知公貧厚貲幣將賻焉公知之過延

平稱疾卧舟中不起太守不能見而去平居癯然言若  
不能出口至其據法守正毅然不顧慮雖萬夫莫回也  
昔孔子謂未見剛者或曰申枨孔子曰枨也慾焉得剛  
嗚呼剛者不可多見久矣若公非所謂剛者歟其所以  
剛者非以其無慾歟予嘗與公同官於閩故表諸其墓  
庶幾有聞其風而興起者

雯峰先生饒公墓表

嗚呼此雯峰先生饒公之墓公嘗仕為郡守惠澤流於

人聲績焯於時矣予不稱其官而表其墓曰先生者蓋先生有德之稱為士而有德功名富貴不足道也公諱秉鑑字憲章世家廣昌之麟昌里曾祖仲實祖文遠父希明累世不仕而以長厚稱母揭氏公生長巨室思以文學顯其身以及其親初從監察御史聶公宗尹受春秋又從教諭羅子濬受尚書發為文章詞采爛然見者驚異弱冠遊京師先冢宰一見許以國器且作文贈之曰他日竦壑昂霄必此子也正統甲子領江右鄉薦兩

試禮部名俱在乙榜例授教職辭不就卒業太學時李  
忠文公為祭酒士之明睿者多在館下公獨與彭文憲  
公友朝夕相切磋學益進景泰三年除廣東肇慶府同  
知肇慶地險俗獷號難治公疏淪宿弊均徭賦繩豪猾  
惠貧弱境內以安鄰郡有羣盜侵掠至境上公督民兵  
敗之斬獲甚衆屬邑有奸氓聚羣不逞欲為亂公單騎  
入其地曉以逆順衆謹然羅拜而散右都御史馬公昂  
征瀧水徭公獻平蠻策馬公善之委公督兵餉暨蠻寇

平又委公城瀧水上其功於朝陞四品俸僉都御史葉公盛巡撫兩廣召公詢以時事公具言盜賊所由起與平寇安民之策葉公深然之用其言羣盜稍戢僉都御史李公秉巡撫南畿聞公名薦於朝欲以為太平府太守不果用尋以葉公薦遷知廉州府廉與交趾接壤連年用兵重以中貴採珠邊民不勝其困公規畫有方民以不勞又什伍其民教以騎射有寇至輒擊敗之葉公上其功特賜寶鈔綵段公痛兩廣賊勢日張民日凋瘵

具奏監軍及諸將無平賊方畧所至惟事剗剗戰小勝  
則張虛聲以邀賞大衄則匿不以聞臣恐數年之間兩  
廣盡為盜區矣章上權貴大怒思有以中之會公督兵  
餉遠出寇乘虛襲城陷之衆因以失守為公罪坐褫職  
廉民千餘人詣當道訟冤且言知府文吏非守城者況  
以公事遠出城陷非其罪也乞還知府以活吾民時當  
道多忌之者莫肯上聞公歸家優游泉石以書史自娛  
又作義倉以賙貧乏立義學以教宗族建雲峰書院與

翰林修撰羅應魁講學其間成化二十二年十月十七日  
以疾歿於家享年七十有四初娶黃氏繼娶王氏無  
子以弟秉綱子弼為嗣一女適同邑何慶同弼以卒之  
年十二月十一日葬公於里之南應山所著有雲峯集  
春秋提要春秋會傳傳於世葬後八年弼錄公行實求  
予表諸墓予讀秦漢以下史疑命之有無久矣及論次  
公行事首末乃知事之窮通信乎有命也公少以博學  
自負銳意取進士所交多一時豪傑然以議論不合於

主司不克如其志及既出仕政聲日聞慨然欲以功名  
自見於世然官僅止二千石竟以非罪黜當公黜時李  
公為冢宰馬公為大司馬葉公為少宗伯皆素知公者  
然不一引手救豈非命耶嗚呼世之為太守者多矣然  
歿而使人稱為先生者則不多見也夫使人稱為良二  
千石曷若使後世稱為先生以昭其有德哉嗚呼雯峯  
戔戔雯溪溶溶先生之名與世無窮

桂林太守衡公墓表



皇明有廉吏曰桂林太守衡公汝寧西平人也其歷官三十餘年清白之操若冰玉然其謝事家居貧不自存其歿也身無以為斂子孫無以為喪真為吏者之師表也公歿廿餘年予為河南按察使移檄汝寧訪求公後得公之子平召而詢之道公之履歷甚詳且丐文表諸墓公之守桂林也先公實薦之子於公有世舊誼不可辭乃為叙之公諱岳字世瞻其先世家隨州父通元季以武功累官至百夫長典屯香山國初棄官歸過西平

道梗不通遂留家焉母周氏慈惠喜施予公少以俊茂  
補郡學弟子員中河南鄉試遂升太學洪武三十年詔  
國子監選諸生通理道者赴詹事府議事六館之士咸  
推公往公敷陳時政切而不迂所司以聞擢廣東潮州  
府同知公酌己惠民自常祿外餽遺一無取布衣蔬食  
不異寒士嶺海間翕然稱其廉三十五年遷陝西西安  
府知府其清操善政如在潮時丁內艱去職服闋改知  
慶陽益以清白自勵民愛之如父母僚友諸婦嘗會飲

公之內子與焉在席者金鈿綺綉爛然而公內子荆釵布裙而已既罷頗不樂公曰汝坐於何處曰首席公曰既坐首席又要服飾華好富貴可兼得耶慶陽人至今以為口實永樂十年朝覲至京以言事忤旨謫戍交趾慶陽西安二郡民千餘人詣闕請貰公以終其惠不報仁宗皇帝嗣位下詔求賢監察御史袁錠鹽運使何士英指揮范智交章薦公起為南城令以舊官復任改南豐令其為令祿薄不足用常於官舍種蔬以自給家人

或有愠色輒曰不猶愈於充軍時耶無不意滿正統四年夏五月公秩滿至京欲告歸時先公為刑部侍郎薦公於朝遂擢桂林守在郡五年廉慎之操愷悌之政始終如一以年踰七十致其政而歸景泰三年三月三日終於家享年八十有四葬於縣大堰灣之原配王氏有淑德子七曰友民曰忠曰用曰平曰直曰美曰慶孫八曰世隆曰鏞曰世雄曰林曰海曰鉞曰鎧曰錠今都御史江浦張公巡撫河南過西平聞公之賢令有司恤其

家且補世隆鏞邑弟子員俾紹素業嗚呼廉吏之不聞  
於世久矣碩鼠之刺城烏之謠在古且然況後世乎世  
所謂貪者固不足道其矯而為廉者垢衣敝屣以欺人  
而後房姬媵極珠翠之麗亦豈真廉者哉若公者迺真  
廉吏也予故表其墓以為世勸

故承事郎趙君孺人華氏墓表

承事郎無錫趙君汝明之配曰孺人華氏以弘治元年  
春三月十有九日卒其子潑汚卜以卒之明年冬十有

一月六日葬於邑嵩山先塋啓承事君之兆合而窆焉  
先期以江西布政使秦君廷韶所述孺人行狀託其父  
友吏部員外郎馬君宗勉屬予表諸墓予亟辭不獲乃  
據狀所述叙而表之曰孺人諱淑清無錫之名家子在  
元初有諱子勉者累官江浙財賦都總管府同知其五  
世祖也曾祖德遠祖仲安父以常皆隱居不仕而以貲  
產雄於鄉母虞氏自幼溫嫺靜莊稍長習蠶績紉縫之  
事暇則誦詩書習圖史足跡不出閨閣父母愛之曰賢

女也擇所從以歸承事君時舅姑在堂孺人入門孝養篤志姑嘗盛夏遘疾孺人左右扶持晝夜無少懈疾亟刺股血和羹以進姑歡之頓愈自舅姑以及六親又皆曰孝婦也趙系出天潢族大貲厚而承事君無他兄弟恒執役於官孺人綜理家政僮使千指懍懍趨命凡歲時羔豚之祭宗戚慶弔餽遺之禮咸中儀則田園之籍日增承事君歎曰吾家業所以益充者以有賢嬖焉耳承事君三男子其一孽也孺人教字如一及諸子就學

督勵甚嚴閱史見古人善惡成敗輒舉以語諸子曰汝當為此不得為彼故諸子皆巖然有立鄉之人又皆曰趙氏諸子秀出者非獨承事君之教蓋有內訓焉承事君卒孺人傳內政於其婦日誦佛書安恬自適而已及得疾諸子涕泣進藥孺人曰吾年踰八十得從汝父供養舅姑於地下足矣何以藥為不食數日而卒距其生永樂六年八月二十有四日享年八十有一子男三長瀟次濛次沔俱以輸粟授承事郎瀟後孺人一年卒女



四華春顧瑜蔡祚蔣堂其壻也孫男二長楠以餉邊功授蘇州衛指揮僉事次桓孫女三曾孫男一其子孫繩蟄又如此予讀劉向列女傳見其所叙多者人二三事少者一事而已若孺人者生名家嬪名士女德婦道母儀皆可紀而又享壽考多子孫視向所傳奚愧焉顧子不腆之詞不足昭孺人之懿行姑撮其大者以遺其子俾琢石墓上庶幾有如向者採而傳焉

通議大夫雲南按察使劉公墓表

成化十有四年春雲南按察使劉公仗和帥其屬入覲  
懇求謝事吏部以聞憲宗皇帝特允其請公歸徜徉林  
泉者七年以疾卒於家享年六十有四時二十一年五  
月廿有四日也其子縝等以是年九月庚午葬於邑黃  
土尾之原依先壠也葬後五年公之子絢會試來京詣  
予拜且泣曰知先君之行詳且實者莫先生若乞為文  
表諸墓嗚呼公實忠愍公之仲子惟忠愍公與先冢宰  
同領鄉薦而公又與予同舉於鄉同登進士第世契之

厚非他人比誼不可辭乃為叙次其事俾刻之墓上公諱鈺仗和其字也其先本長沙定王之裔王之子蒼別封安城侯安城即今吉之安福也至其孫壽光以罪國除因家於邑之茨溪祚胤蕃衍歷唐及宋以至於元代有顯者曾祖諱子定別號新齋始自茨溪徙家邑之葛溪祖諱伯文別號文園贈禮部儀制主事考諱球由進士累官翰林院侍講上疏牾權奸歿於制獄贈翰林院學士諡忠愍母鄧氏累贈太宜人公自幼穎敏過人忠

愍躬教之時姚文敏公學於忠愍公之門公與之上下  
議論文敏每嘆服之稍長從學於禮部侍郎李公克述  
學益大進會忠愍以忠諫受禍公哀痛毀瘠幾不能生  
服闋讀書養母無復仕進意景皇帝即位臺諫言忠愍  
之冤詔贈官賜謚且祀於郡之忠節祠刑部侍郎楊公  
彥謚巡撫江西召公語之曰而翁忠節已獲昭雪子可  
以仕矣公乃赴江右省試以春秋魁多士登甲戌進士  
第改翰林庶吉士預修寰宇通志書成賜楮幣文綺擢

廣東道監察御史未幾出巡福建畿郡遼東於時同官者務擊搏以峙聲威公獨慎憲度理冤獄察吏治巡歷所至訪民利病而興除之不求赫赫名人皆以為得憲體真定有嫠婦不安其室其族長恥之合羣從毆殺之有司坐以謀殺當死者七人公曰此羞惡之心所發也何可深罪具以上請遂皆免死福建都指揮僉事錢輅與其長劉姓者有隙劉密白鎮守中官誣以罪乘夜以兵圍其第輅覺而逃中官遽以輅反聞廷議遣官會公

覈其事輅亦詣公自首公具奏輅懼罪而逃非反也輅  
得釋每語人曰微劉御史吾族夷矣汀州豪民欲奪鄰  
之墳地以葬其親鄰不與豪怒言於朝云其地當出帝  
王英宗遣中貴人會公驗之公曰七閩遐且僻寧有帝  
王地耶寘妄言者以法既還臺同官以私忿欲劾大臣  
且誣以閨門之私以章示公公曰言事當顧大體奈何  
以曖昧之事汙巖大臣其人慚而削之天順甲申陞浙  
江按察司副使奉璽書提督學校公至則明教條嚴考

校進茂良黜情竊由是兩浙文風丕振擢倫魁登臚仕  
者彬彬焉成化辛卯遷按察使或疑公優於文學法律  
非所長及見公聽辭決獄曲當其情乃大服尋丁太宜  
人憂去服闋改雲南按察使雲南荒服之地外與哀牢  
交趾接公因俗為治寬其禁令馴以恩信蠻獍畏而懷  
之及公歸羣夷皆太息曰是善撫我者何遽去耶公娶  
伍氏封宜人子男三續舉進士為南京禮部主事徵以  
餉邊功授承事郎絢鄉貢進士女二適袁州醫學正術

歐陽淮次適廬陵庠生曾洪孫男七祚祺禧祠褫裾袪  
公性孝友忠愍公歿事太宜人以孝稱與兄叅政仗德  
友愛尤篤接人一以誠意而世所謂機變之巧若無聞  
者居官盡其職分所當為未嘗銜能矜名以求人知而  
當道亦無能知之者故其官止於此昔司馬溫公論才  
德之辨以為聰察強毅之謂才正直中和之謂德且謂  
察者多蔽於才而遺於德若公非所謂正直中和者耶  
然官止三品而未極其用抑察者有所遺耶雖然諸子



翼翼諸孫螭螭天之報公庶幾在此而無數予故表諸其墓以為樹德者之式云

故中奉大夫廣東布政司右布政使左公墓表  
弘治二年冬十有二月壬子廣東布政使盱江左公以疾卒於家時其子慧游學京師聞訃號慟詣予泣且拜曰慧不孝禍延先君方有疾不獲躬湯藥及殮又不獲眎衣衾之厚薄茲將匍匐歸裏事大懼先君善行無傳以重不孝之罪敢求先生之文表諸墓用垂永久嗚呼

公予畏友也年雖少長於予而素強無疾子方期謝事  
南歸得從公徜徉紅泉碧澗之間孰意遽止於此耶表  
阡之文奚忍為之然念公與予有世契重以慧之請又  
不忍不為也公諱贊字時翊世家盱之南城曾祖諱友  
文仕元為平樂州學正署南城縣尉事祖諱彥彰以能  
詩名贈文林郎監察御史考諱璫別號訥菴登進士第  
累官山東布政司左叅政以公仕於朝贈大中大夫資  
治少尹妣白氏累贈淑人公初有至性方五六歲母淑

人患乳癰甚危公日跪膝前吮之癰尋愈稍長就學日記數千言作詩語出驚人字畫遒勁可喜少宰同邑鄭公文實見之謂訥菴曰此兒穎悟過人當使從碩師必克有成訥菴乃命公學春秋於太宰姚公大章學書於太常卿程公南雲由是以詞翰名於時公天分既高加以篤學未冠博極羣書於經史疑義制度沿革罔不窮探而謹識之名儒宿學皆折輩行與之友寧獻王聞其名召見使賦玉界尺詩援筆立就王覽之亟加稱賀且

曰秀才詞翰兼美不易得也以所作草書賜之天順丁  
丑登進士第擢吏部稽勲司主事丁訥菴憂去服闋復  
舊任未幾丁淑人憂去服闋改司封主事尋陞稽勲司  
員外郎又陞郎中政務之暇蒐覽百氏作為文章未嘗  
少廢嘗同考禮部會試取舍各當士論稱之遷浙江布  
政司右叅政巡歷列郡所至勸農興學理冤獄謫奸豪  
兩浙荒歉之餘露飢遍野公檄所司殮而瘞之吏部累  
薦公材堪典大藩不果用成化二十二年秋陞廣東右

布政使未赴以老謝事優游泉石先世有別墅在麻源  
三谷每風日清美輒與鄉之耆舊登覽觴詠或連日忘  
歸家素充裕鄉人有假貸不能償者即焚其券家食時  
嘗宿逆旅旁舍有自經者衆救之而甦公問其故曰負  
官租不能辦耳公如數予之不問其姓名其好施多此  
類與人接無賢愚皆盡其懽然其所推以為賢者不過  
數人君子是以知公非汎交者初公學於姚文敏公又  
受知李文達公二公秉鈞衡人謂公且大用然公外和

內剛議論是非不肯少假借以是為當道所忌在浙藩九年吏部薦章屢上皆為同進者所先公恬然無毫髮見顏面晚乃登用而公無意於世矣娶胡氏有賢行累封宜人側室林氏劉氏毛氏子男二長即慧次曰愷女六適同邑鄧昇陶祿上官偉黃某張某孫男一曰備孫女三所著有桂坡遇錄一卷桂坡文集三十卷梅花百詠一卷深衣考正一卷歷解易覽一卷皆傳於世桂坡公少時讀書處因以自號公為人豪邁不羈至其為文

謹繩尺崇理致讀之溫然可愛其書兼善諸體而尤精於隸端重奇古得二蔡筆意憲宗皇帝嘗訪求善隸書者或以公所書進上覽之稱善諸子卜以某年月日葬公於某山之原蓋公生前所擇吉壤也予嘗論先王盛時名卿大夫之胄多能世其家自漢以來若汝南袁氏河東柳氏東萊呂氏蓋亦庶幾焉其子若孫雖隱顯不一德業不齊然風流文雅終異乎崛起者盱江左氏望臨一鄉訥菴以謙恭惠和之德作於前而公以宏博俊

瑋之材振於後信乎其家之多賢也視世祿之家不以  
一善聞者何如哉訥菴與先家宰為同年友而子與公  
有通家之好故撮其行已為政之槩表諸墓非徒著公  
之行以示其子孫以告吾邦世家俾有所感奮焉

袞古余先生墓表

先生諱倫字公理姓余氏其先有諱澄者家蜀之眉山  
仕唐官至諫議大夫卒謚曰襄諫議之子諱慶為臨安  
太守廣明之亂避地下邳其後再遷於新安至梁開平



間又遷南豐之沙溪今所居是也曾祖諱平甫隱居求志祖諱文德歲凶減價以糶鄉人德之父諱應祖憫鄉之子弟無師設義學以教之母某氏婦道母儀宗姻稱焉先生自幼穎敏好學而不樂仕進構一室以為講學之所積書數萬卷法書古器充牣其中日與名人賢士講論聖賢之學扁之曰祐古士大夫皆有賦詠學者因稱為祐古先生鄉鄰有競者請先生質之辨其曲直無所徇罔不心服或恥以是非溷先生中途胥命而返平

居儼然端坐雖族子孫過門不衣冠不見既見誨以古  
人為己之學間及經史疑義皆充然有得而退有司欲  
以賢良舉固辭不就凶歲鄉鄰飢窘先生竭囷倉以賑  
焉不足則貸於巨室以益之憲宗皇帝嘗詔民年八十  
以上為鄉里推服者賜以冠帶先生與焉居鄉益恂恂  
謙慎不以受寵誇里閭每歲有司舉行鄉飲請為正賓  
亦謝不往不敢以齒德先人也先生雖老素無疾一日  
體中微覺不佳遽就枕家人欲召醫搖手止之溘然而

逝時弘治六年二月七日也娶宜黃樂氏宋名臣史之裔有賢行子男二曰瑒曰球女一嫁子子道同孫男三長淳次汲季學孫女二瑒等卜某年月日奉柩葬於某山之原且述先生之行為狀屬余表諸墓子讀兩漢以下史見士之隱居不仕德義著聞者代有其人雖五代亂世亦有可紀如鄭遨李自倫者求諸近世蓋不多見先生以文學行誼師範一鄉有戚同文之風發粟賑窮惠其州里有連舜賓之賢至於鄉人爭訟直於其家又

如古之王彥方嗚呼孰謂今之人果不及古人哉予故表諸其墓使過者知吾鄉有行誼如古君子者異時太史氏傳逸民獨行者或有采焉

承事郎黃君廷瑞墓表

銀溪黃君愈敬以書告予曰吾兒琮歿且葬於茲十有四年矣每念及之淚輒潛然下蓋是兒也生而淑吾不能永其年思所以永其名嘗磬石置其墓前子能為吾表而識之以紓吾哀乎因授予以行狀予不獲辭則叙

次而歸之曰琮字廷瑞愈敬第三子也自其曾祖仲名祖希古世以善聞而愈敬溫恭惠和克紹先儀母賴氏邑名士伯淵之女廷瑞幼時姿儀端潔容止言辭溫溫可愛自宗戚以及里閭皆嗟異之稍長朝夕怡愉以共子職與兄璋琳弟琬琰璨友愛尤篤家雖充裕而服食有常度無豪靡之習鄰邑寧都令羅珪以歲歉走書勸廷瑞出粟賑飢廷瑞曰此義事也白其父出米二百五十石以賑不能自食者事聞朝廷授廷瑞承事郎以寵

之一日得疾慮貽父母憂戒家人勿言疾既亟父母問之乃泣然曰兒弗克終養矣又屬其兄延素與往還者至私室從容道故舊與訣且曰修短命也顧恐吾親不自堪耳客退沐浴正衣冠溘然而逝時成化辛卯八月廿一日也距其生正統癸亥正月十一日得年二十有九以沒之年十有二月六日葬邑之古原山前坳之陽娶寧都蕭氏義民大韶之女生二子男曰極女旺廷瑞既歿蕭自誓守節以事老字幼為己責今極已授室而

旺嫁子子永孚鄉里皆嗟歎其難嗟夫人之有賢子孰  
不願其壽考哉然壽夭有命焉韓子有言生而不淑孰  
謂其壽死而不朽孰謂之夭觀愈敬過時而哀可以知  
廷瑞順乎親觀蕭氏不貳其操可以知廷瑞刑於家是  
所謂歿有令名壽莫永乎此也嗚呼廷瑞其行也良其  
名也光年雖不延其存者長百世之下過其墓者讀予  
之文庶幾勿伐其樹勿啓其藏耶

椒邱文集卷三十一

欽定四庫全書

集部

椒邱文集卷三十二至  
四

詳校官庶吉士<sub>臣</sub>汪彥博

中書<sub>臣</sub>劉源溥覆勘

總校官進士<sub>臣</sub>朱鈐

校對官編修<sub>臣</sub>許兆椿

謄錄監生<sub>臣</sub>王華封



欽定四庫全書

椒邱文集卷三十二

明 何喬新 撰

奏議集畧

題為隱匿賊情謀陷城池欺罔朝廷擅作威福僭禮犯  
分狂殺人命毒害軍民謀害期親詐傳勅旨妄造妖言  
謀為不軌邀截實封阻當伸訴變亂成法倚法為姦貪  
淫酷暴敗倫傷化魔魅不道等事節該欽奉勅茲特命

爾同錦衣衛指揮劉綱備詞前去四川會同鎮守太監  
劉雅巡撫右副都御史劉璋巡按監察御史何鈞親詣  
播州撫提事內干證人犯并吊應查文卷將各奏內事  
情從公逐一審勘明白干礙宣慰使楊愛宣撫楊友都  
指揮楊綱叅政謝士元副使崔廷蕙及事有應面證者  
就便撫提楊友楊愛并行提楊剛等面證虛實有應委  
官勘檢者行取附近湖廣三司堂上官公同勘檢贓物  
家財等項應追理者追理僭用器服等物應入官者入

官被攻城寨從長處置應否開設府縣學校亦就定奪  
有罪人犯依律議擬情輕者各照常例并土俗事例先  
行發落情重者牢固監候若楊友等挾讎妄奏各有不  
實亦要具情問結通行奏來定奪欽此欽遵又該臣等  
題為勘提處置夷情事節該奉聖旨恁到播州事當對  
證的撫提楊愛楊友面對虛實即省發聽候不必監禁  
欽此又據四川重慶府申抄蒙巡撫四川都察院右副  
都御史劉案驗准本院咨該本院題該播州宣慰司

長官張淵弟張深奏為僭擬宮禁名號交結親王潛謀  
不臣縱為不法等事本院看得所奏事情與楊友等先  
奏情詞多有相同欲行侍郎等官何等通提并勘問  
結果礙唐王奏請定奪等因具題奏聖旨是張深既係  
楊愛原奏同謀人數還差的當人員押解去交付何喬  
新等併問欽此又准本院咨該播州宣化長官司長官  
何清弟何洙奏為謀為不軌殘殺人命橫取民財欺罔  
不法等事該通政使司官奏奉聖旨都察院知道欽此

本院看得所奏情詞與楊友楊愛奏詞內姓名事情多有相同備抄各詞轉行臣等併勘又准本院咨該本院題該撫州宣慰使司宣慰使楊愛等奏為奸黨欺罔謀害土官殺死人命擾亂地方邊夷等事及草塘安撫司安撫宋韜黃平安撫司安撫羅贊容山等六長官司長官張經張通毛釗楊玉鄭旭輪署司事舍人李勲等各奏稱宣撫楊友兄弟及何清等奪占地方擾亂蠻夷引惹邊蠻激變夷民等情本院看得各奏情詞與楊友

張深等先奏事干一連欲行侍郎等官何等會同鎮  
守巡撫等官劉雅等併勘中間奏有虛詐亦就撫提問  
結等因具題奉聖旨是欽此又准本院咨該本院題該  
宣慰使楊愛奏為欺誑朝廷妄捏賊情違法謀害土官  
懼罪擅帶軍夷出境不守地方城池等事看得所奏與  
楊友等先奏事有干連合行差官齎文交與各官併勘  
施行等因具題奉聖旨是欽此欽遵抄詞轉行臣等行  
據湖廣都布按三司委官都指揮僉事房昂右參議李

俊僉事洪廷臣將勘過緣由連人犯呈解前來除被攻城寨及應否開設府縣學校另行處置外會同欽差鎮守四川太監劉巡撫右副都御史劉巡按監察御史何問得犯人張淵招任播州宣慰司隨司辦事長官洪武初年有播州沿邊安撫司安撫使楊鏗率屬投順欽蒙改安撫司為宣慰司陞楊鏗為宣慰使撫治民夷楊鏗病故伊男楊昇孫楊綱曾孫楊輝相繼襲職宣德正統年間楊綱不合買到土民吳慶長壽黃保福僧

欽定四庫全書

刑部文集  
卷三十二

義保九保小進保大朱保元保閹割為火者在家使喚  
景泰天順年間有楊輝亦不合收買土民并苗人曾保  
王壽陳元即何宸元大進保唐奴福庸范蠻羅保福元  
觀音張沅何勝昌王福善宋慶祥王永貴石超祖張保  
吳誠四保張永富楊善琴童王慶仁壽李馬龍章及已  
故王景德祿壽雲壽即童壽小鄧即福壽私自閹割使  
喚有吳慶等明知於例有違各亦不合在伊家住過景  
泰三年正月內有寨老袁昱等思得本州稅糧遞年運



赴貴州興隆等倉上納搬運本色艱難告願折納輕齋  
銀兩楊輝准令各里每米一石折收苗銀一兩類解該  
倉買米上納彼時苗蠻反叛欽差總兵官靖遠伯王驥  
領兵征勦楊輝輸粟以助軍餉蒙賜勅獎諭本年十二  
月內楊輝要表彰朝廷恩典起立坊牌上寫勅賜二字  
景泰六年四月內楊輝訪知馬湖府土民李鑑等在於  
本州地名花崖溪偷砍杉木數多楊輝帶領土軍人等  
將李鑑等赶散遺下杉枋二千餘塊令冠帶民人閻昂

欽定四庫全書

卷三十二

借債赤水等里人民運至水次差頭目藺希真韓璽等裝至南京等處賣得羅段三梭共值銀一千三百餘兩交與楊輝收訖天順三年間楊輝因妻俞氏無子又娶田氏為妾天順八年七月十七日田氏生男楊友本年十月初九日俞氏生男楊愛以後田氏又生男楊敏楊敵楊敷俞氏又生男楊孜成化三年八月內本司長官何庸病故戶絕有伊族姪何熙慶不合捏稱係何庸嫡長男告襲前職楊輝不合准信拘集親族里老審取結

狀備申四川都布按三司覆勘具奏准令冒襲前職成  
化五年閏二月內有忠州等處逃民劉鈔等在於真州  
長官司管下瞭蠻坎等處偷挖鉛礦蒙四川布政司左  
參政陳述等督同楊輝將劉鈔等趕散棄下黑鉛五百  
餘擔當將前坎填塞楊輝自合將前項黑鉛入官不合  
令人運至地名三溪寄頓土民趙月升家成化六年月  
日不等有陝西樂戶劉壽劉鑑郭福亮張順為因本處  
艱難各不合逃來本州趁食住過成化七年九月內俞

氏病故楊愛年方八歲田氏掌家妬悍要將伊男楊友承襲百計謀害楊愛有火者長壽極力保護得免於死成化九年十月內楊輝差蘭希真并頭目王標趙進將黑鉛四百擔裝至蘇州等處變賣得銀六百餘兩交與楊輝收訖餘有一百擔仍在趙月升家頓放成化十一年間楊輝得患暗風病證聽信田氏巧說楊友係是長子合當襲替是淵不合阿順勸楊輝將楊友替職有安撫宋韜長官毛釗等俱稱楊氏家法立嗣以嫡不肯保

結有本司典吏顏珪素被楊輝寵信亦勸楊輝將楊愛  
為嗣楊輝因衆心不從只得具奏致仕將楊愛替職楊  
愛年幼一應政事俱係楊輝主張田氏專掌家事莊田  
子粒并家財金銀羅段等物俱係田氏收掌楊愛并不  
得干預本年六月十二日蒙勅楊愛量起土軍跟隨四  
川等處總兵等官征勦大壩山都掌事寧之日差人繳  
勅楊愛不合故違一向不行進繳楊輝因溺愛楊友意  
要分割本州地土另立衙門夤緣授以官職是淵與姐

夫何清已故頭目徐泰馮瞰并楊輝婿俞溫田豐姪楊  
夔各亦不合要圖陞官密與楊輝謀說大壩干地方原  
屬本司與容山重安地方相近今被生苗占據莫若請  
兵征討克平之後就將容山重安所管夷寨分割另立  
宣撫司著大官人做宣撫却不好等語楊輝喜允差人  
拘喚容山長官司長官韓瑄重安長官司長官張通各  
帶印信前來本司商量成化十二年正月內韓瑄張通  
來到本司楊輝分付各官着令各申生苗占據大壩干

扇惑重安容山夷寨為惡不納糧馬等因有韓瑄回說  
各司土民一向納糧當差不敢妄申楊輝怪怒喝出是  
淵與何清各又不合對楊輝言說韓瑄打攪若不懲治  
事終難成本月二十日楊輝令人叫韓瑄到司喝令失  
記名皂隸將韓瑄責打六十大棍攙扶回家至本月二  
十八日因傷身死張通懼怕只得依從楊輝就行捏稱  
大壩干原係本司懷遠府故地景泰年間被山苗占據  
扇惑熟苗為惡不服撫化乞會兵征勦等詞令楊愛出

名具奏蒙勅巡撫四川都察院右副都御史張瓚領兵  
征剿張瓚明知楊輝先已致仕又奏起伊領軍協力攻  
取官軍到彼不啻交鋒苗人強者逃散老弱告願投順  
楊輝屬託張瓚要於彼處設立安撫司并二長官司就  
將楊友俞溫何清等為安撫長官張瓚不合聽屬朦朧  
具奏於大壩干地方設懷遠長官司將俞溫為長官田  
豐為左副長官徐泰為副長官又將容山長官司原管  
雞西等二十五寨捏作丹章容洞地方開設宣化長官



邱文集

防守楊友授職之後一向隨伊父楊輝住過不曾到任止是徐泰馮暉在於宣撫司替伊僉押楊輝又將識字土吏向崧陳敏馮鑰撥去彼處書辦是淵與何清馮暉要得附順田氏謀害楊愛將楊友襲任宣慰使楊愛得知記恨在心因淵等係伊父楊輝寵信不敢聲言本年四月初二日湘川驛驛丞周琳九年考滿是淵央浼楊輝委弟張洪署掌本驛印信彼因本驛缺少鋪陳及缺馬走遞有弟張洪責令馬夫徐昱蒲底等每馬一匹買

補上中下鋪陳各一副及令馬戶韓益之等共出銀一百兩該買馬七匹本年月日不等有弟張洪不合將前項銀兩侵欺入已不行買馬又將上等鋪陳三十副共該價銀一百八十兩盜取回家及將站戶楊道戶丁善奴強占在家使喚本驛官吏因見楊輝寵信淵兄弟不敢告官有弟張深倚張洪聲勢亦不合將本驛馬夫張留三女三真強奪回家使喚後三真走回伊父家縣住一向跟尋未獲成化十三年二月內蒙巡撫都御史張

璦因見宣撫司築城未完軍夫缺糧支給具奏將本州各司成化十四年十五年分該納糧六千七百九十六石撥去彼處上納有楊友妻頭目劉大榮趙鎮何忠公同徵收除完納外仍欠四百二十四石二斗六升各民因見米價高貴情願每糧一石納苗銀一兩五錢劉大榮不合倚恃楊友信任每石勒要苗銀三兩共計一千二百七十二兩七錢八分除買糧上納外餘有苗銀六百三十六兩三錢九分劉大榮盡行侵欺入已本年三

月蒙四川布政司將銀三百兩發本司轉送容山長官  
司糴米支與兵夫起蓋宣化長官司衙門彼時容山長  
官司缺官委何清署掌印信照依時價每銀一兩買米  
二石五斗共該七百五十石何清每斗不合加收一升  
共米八百二十五石本司又委何清徵收清平倉改撥  
稅糧三百一十七石一斗五升何清又每斗加收一升  
共米三百四十八石八斗六升五合前後共該米一千  
一百七十三石八斗六升五合除陸續支米四百八十

石與兵夫外餘米六百九十三石八斗六升五合俱係何清侵欺入已本年十月內蒙巡撫都御史張瓚看得宣撫司守備築城土軍苗獠人等數多撥去糧少又行令布政使馬馴僉事張子言將先年征進餘剩糧銀并折色糴糴等物共折糧三萬六千石發與楊輝收領支給有楊輝行令安撫宋韜等按月支與築城守備軍夫俱已盡絕楊愛不曾經手後巡撫都御史孫仁聽得道路傳說前項糧價支銷不明行仰分守等官查究本司

將支銷數目造冊繳報訖本年失記月日有草羅思南  
宣慰使田宗鼎孫男田貴與伊堂兄田忠嫂冉氏俱從  
遼東配所逃回播州地方躲住楊輝因與田貴等關親  
亦不合容隱在地名水車壩莊所住過成化十四年正  
月十二日楊友與伊父妾五兒各不合通姦楊輝知覺  
要將五兒打死有五兒懼怕潛於茶房內自縊身死楊  
輝又要將楊友殺死楊愛苦勸楊輝含忍不曽追究本  
年二月內有頭目王宋保在於安寧守備是淵因見土

軍逃回數多不合對王宗保嚇說係伊受財賣放要赴  
楊愛處稟知追究王宗保怕打將苗銀一十兩送淵收  
接入已本年五月十三日有弟張洪取伊小姨雲秀即  
趙氏來家習學女工明知趙氏先已聘與土民楊壅為  
妻不合將伊姦訖一度以後往來通姦不絕楊壅訪知  
將情赴播州長官司告發追出聘財給還楊壅將趙氏  
斷與伊母宋氏領回改嫁有弟張洪仍將趙氏刁引回  
家姦收為妾本年八月內有土民李瑩將屋基一段賣



與淵為業議作價銀二百兩陸續止還過銀一百四十兩仍欠六十兩是淵恃強負賴不還本年九月內楊輝將莊田一百四十五處茶園二十六處蠟崖二十八處獵場一十一處魚潭一十三處作四分均分與楊友楊愛楊孜楊敏因是楊友楊愛年長俱有職事分與金銀器皿等項親寫分單為照楊孜楊敏年幼俱無職役止將金壺一把金臺盤一副金盃一口分與楊孜及將金壺一把金臺盤一副金盃一口金鍾二箇分與楊敏俱

令田氏收藏不曾寫與分單又將火者吳慶等二十名  
分與楊愛楊孜使喚張沅等一十八名分與楊友楊敏  
使喚本年月日不等楊愛因見各里土民不諳書辦不  
合違例將市民姚鑑僉充本司兵房典吏王裕僉充本  
司刑房典吏何文僉充本司戶房典吏楊崙僉充本司  
禮房令史有姚鑑王裕何文楊崙各亦不合違例着役  
成化十五年正月內楊友因往安寧經過餘慶白泥等  
處又不合將餘慶長官司管下站戶毛顯常等地名班

溪巴村大寨鐵針崖羅家寨五處水田八百稅陸地二十處強占創立田莊將湘川等驛馬夫孫羊何祥黃元受卻楚鄒石玄蠻程胡李勝祖等二百五十五戶占作佃戶又令何清劉大榮各又不合將白泥長官司管下站戶楊昌福田斌水田九十畝巴必聰等陸地一百畝強占為莊招引九姓土獠在彼住種楊友因有獵場在山羊園等處每年打獵又將土民母文昌等田禾蹂踐及將地名落蒙水老母潭等處占作魚潭撈取魚鮮禁

人不許放水灌溉又將民人袁二保水田三畝占種有伊要告纔將牛四頭准還田價本年二月內有烏江驛馬夫梁元不合畏避走逃艱難帶同伊戶丁梁章梁小羊梁竹梁河逃往安寧宣撫司打造鐵器為生本年五月初五日本司頭目李鑑明即李鑑圓已死男李用之飲酒沉醉手執斧頭要殺伊父有李鑑圓將情具告播州長官司行拏間李用之懼罪逃走不知去向本年六月內有爛土苗頭齋果不忿本州開設懷遠長官司衙

門聚衆攻破本司并靖南堡將守備土軍三百名盡行殺  
虜有本司長官余溫田豐因被苗賊占據衙門俱回本  
州住過原撥備禦土軍陸續逃故止有四百二十二名  
仍要安寧守禦蒙貴州鎮守總兵等官具奏與四川會  
兵征進齋果起調本司土軍聽候夾攻本司因缺少號  
布具申四川布政司蒙行仰本司差頭目宋齊賢前去  
永寧倉關出綿布五百匹運回本司轉送安寧宣撫司  
交與楊友收候應用本年十二月內是淵仍要圖陞官

職密與楊輝計議要誘貴州新添等長官司奏保楊友  
為宣慰使事成之後仍將淵保任宣慰同知楊輝聽信  
就令淵與何清已死男何楫前去貴州地方哄誘新添  
等長官司長官宋安等各亦不合依聽捏稱宣撫楊友  
據忠効力撫化有方夷寨聞其風聲治効不勝戀慕乞  
將新添麻哈等一十七長官司開設宣慰使司將楊友  
改任宣慰使等詞具本差人齎奏間楊輝就令何楫將  
帶銀二百兩金一百兩金相寶石帶一條金相嵌青紅

寶石珍珠綴素草帽一頂珊瑚樹一株素玉帶一條赴京央人打點准行仍將前詞具申巡撫貴州副都御史陳儼處蒙叅稱楊友年幼不得一日到任管事何得有風聲治効足以感人顯是宋安等妝飾前詞妄行奏擾行文四川巡撫等官戒諭楊輝父子不得越境扇惑地方成化十六年二月內何楫到京被彭城衛餘丁胡亮等誣取前項金銀又蒙兵部看得前事難准立案不行何楫將玉帶寶石等物變賣銀兩在於教坊司宿娼花

費致被西廠校尉訪出拏送錦衣衛鎮撫司究問何楫  
又不合隱情妄招係貴州新添長官司通事何受致蒙  
准信奏送貴州道問擬審允遞發巡按貴州監察御史  
再問定奪行至中途何楫因花費前項金銀懼怕楊輝  
追取就行脫逃赴京又假寫楊輝書信問在京客人朱  
安借銀四百兩到於樂人劉四兒家花費無存本年五  
月內有江西九江府德化縣儒學訓導越雍即越熙雍  
丁憂回伊原籍貴竹長官司守制楊輝訪得本官學行



頗優請到本州令楊友楊愛從伊讀書作課後越雍  
服滿赴京除授唐府教授本年八月失記日期有男張  
采不合與淵妾五真通姦是淵將五真打死張采躲避  
以後不曾追究本年月日不等有本司頭目韓璽不合  
騙取土民李文明等牛二十七頭又將銀三十二兩八  
錢借與土民白如清等多取利銀七十五兩七錢被李  
文明白如清等告發楊愛行提韓璽到官責對明白追  
出牛隻利銀給還各主問擬發落訖成化十七年二月

內楊友又不合節次與楊輝妾梁真并使女佛真通姦  
楊輝得知將梁真佛真殺死捉拏楊友要行打死就將  
草料逼伊喫食有楊愛與伊母田氏再三哀告方纔疎  
放本月失記日期有弟張演不合發掘土民趙添祖墳  
二所將屍骸搬移別處起蓋房屋在上本年三月內田  
氏病故楊輝將楊敵分與楊友撫養楊敷分與楊愛撫  
養本月失記的日弟張演因見叔祖張秀已故將伊妾  
楊氏調戲求姦楊氏要告當得宗族勸阻本年七月內

楊友倚勢將本州文昌宮下常住水田八畝鋤毀禾苗  
起蓋房舍有住持道士劉守堅哀告楊友喝罵不從本  
年十月十三日有宣撫司軍人周川保不合串同生苗  
阿夜將江西臨江府新喻縣不知名楊客殺死劫去貨  
本銀兩有寨長全仁魁赴楊友處報知楊友差人緝拏  
周川保到官明知本犯罪雖應死自合問擬申詳待報  
處決却不合喝令總旗郭欽不合依聽用刀將周川保  
砍死本年十二月內本司攢造黃冊令里長白誼吳永

信追收各里人戶造冊盤纏等項銀一百兩藏放在司  
被不知名人偷去有楊輝差淵弟張洪拱補間是淵要  
謀播州長官司長官王炳職事分付弟張洪將白誼吳  
永信用刑拷打逼令誣供王炳偷去前項銀兩各人不  
從有弟張洪又不合聽淵主使將吳永信等連日拷打  
俱各傷重方纔踈放回家至本月初七日吳永信因傷  
身死伊家將屍燒化訖白誼醫治痊可是淵又行唆使  
楊輝將王炳發去安寧守備在彼病故成化十八年正

月內本司委淵管造黃冊有楊輝要將東青等里土民  
駱恕隆等撥與楊友管轄又恐變亂黃冊令淵將駱恕  
隆等開作死絕各戶田糧飛報大溪內外二寨後楊愛  
查出前弊就行改正訖本年二月內蒙四川布政司差  
雜造局副使駱鎮等齎送官銀三千五百兩着落本司  
收買足色好金五百兩差人解司類進楊愛就將前銀  
派發所屬黃平等安撫司白泥等長官司收買好金令  
淵弟張深頭目蘭希純令史劉淳分役催收有弟張深

與蘭希純劉淳指以成色不足為由除正數外各又不合勒要各司加耗金多寡不等共金一百三兩九錢九分內將一十五兩分與蘭希純一十兩分與劉淳其餘俱係弟張深強收入已本年四月初一日弟張深等將收過散碎金五百兩送赴本司有楊愛將金印封完備差吏張深與頭目陳昇解赴布政司當官開拆秤少四兩五錢并燒煖折耗足色金四十兩劉仰本司作急買完差人解司本司因無處易買行令安撫長官司共湊

銀二百八十兩抵還前銀仍差弟張深解赴該司納完  
取獲批迴不期陳昇訪知前情具狀赴楊愛處首發拘  
弟張深并蘭希純劉淳到官審問明白追出原分金完  
足封收在庫各人問擬發落訖有弟張深懷恨在心本  
年九月內松坎驛馬夫蔡宣不合畏避走避艱難逃在  
本州地名竹尾寨隱情躲住有弟張演得知就將蔡宣  
并姪蔡賢捉拏到家逼令各人認係本家雇工人蔡宣  
等無奈只得共湊苗銀三十兩與弟張演收訖方纔踈

放本月十六日楊輝令本司頭目王標戴秉文護送楊友前去安寧到任有楊友因見安寧城外苗賊時常往來仍與王標等回還本司住過每遇聖節千秋節冬至正旦仍往彼處行禮本年十月內蒙巡撫四川都察院右副都御史孫仁奏准上官衙門不許妄捏地方情事徑自具奏仍仰所屬腹裏關隘去處盤詰把截及通行所屬土官衙門遵守本月十八日楊愛因水西羅鬼所管蠻人將本司儒溪赤水等里民人殺虜不服講斷自



行帶領官目人等親詣彼處會同水西宣慰使安貴榮  
講斷間恭遇萬壽聖節就於水西驛行禮本年失記月  
日本司差頭目文錦前往南京進繳黃冊就令與松坎  
驛馬夫猶敬順帶杉枋一十五片前去變賣收買鋪陳  
文錦等將杉枋賣銀三十八兩各不合欺隱分用捏稱  
前項杉枋被水漂流有頭目李斌訪知赴本司首發就  
拘文錦等審問是實追出前銀給付本驛置買鋪陳將  
文錦等量情發落訖成化十九年正月內有楊輝患病

沉重分付楊友楊愛候楊啟楊敷長成將孝義莊等處莊田撥與楊啟海龍堤等處莊田撥與楊敷後楊輝病故是淵令妻宋氏帶同使女閨真前去弔喪有楊愛使女宋真偷出女裙一腰送與閨真接受不期楊愛知覺搜出前裙宋真怕打潛於本家茶房內自縊身死本月十二日楊孜得患傷寒病證身故楊愛疑是淵與楊友通同暗行毒死一向詢訪不得的確楊輝病故之後楊愛方纔管事思得自祖以來置有大水田柳川冉川屯

平大足黃魚永安先峯洪江米田通平毛陂石梁雷水  
崔家桃溪半山泥川等莊並獵場魚潭茶園蠟岬連年  
各令頭目劉應清楊禧傳晟蒙裕李乾李宗賢蒙福席  
巨成顏章玄楊瑞林羅其何道斯朝何熙淳吳從義牟  
忠傳宗政韓善謝琰韓秀閻晟李福受劉琰徐讓吳楷  
閻昂李智楊宗祿吳淵廣黃澄吳淵興提督家人看養  
孳牲布種田禾麻麥黍豆紅花之類并採取魚鮮打捕  
野獸以供家用每遇收成之時又令火者福僧觀音王

壽長壽何宸元福庸黃保元保吳慶大進保義保范蠻  
九保曾保大來保小進保羅保福元唐奴并童壽祿壽  
福壽壽童往來各莊照管楊愛管事以來思得長壽顏  
珪有功於已專一信用淵與何清等日前撥置伊父要  
立楊友因此疎棄不用是淵與弟張洪張深張演并何  
清怪恨要得謀害楊愛仍將楊友襲職有顏珪因見楊  
輝存日將所屬各驛馬戶分與淵及何清并伊宗族弟  
姪作佃戶使喚苦被各家剝削多致逃竄勸楊愛更改

舊弊楊愛准聽將各家役占馬戶盡行清出止當本等  
差徭淵等得知出於顏珪之計各懷怪恨顏珪亦不合  
要人敬畏時常對衆揚說某事是我勸宣慰行某事是  
我對宣慰說以此人皆趨附淵等愈加不平本年二月  
內有本州里老張洪等連名告稱凡遇進貢等項公差  
人員遞年俱於各里點差人夫津貼盤纏節被差去之  
人分外勒取數多情願預先認納銀兩免致臨期逼迫  
楊愛准聽照依有司均徭事例上戶納銀十兩中戶納

銀四兩下戶納銀一兩五錢備造手冊委頭目周從鴈  
照依等第徵收在官遇有公差人員量計程途遠近將  
前銀支給本年五月內楊友思得何楫替伊營求宣慰  
不成又將金銀等物花費具呈本司有楊愛批差顏珪  
與淵弟張深赴京到於樂人劉四兒家將何楫捉獲回  
司監追費用過金銀并原借朱安銀兩本月初二日有  
王景德因與楊敏遊戲將楊敏推跌落水王景德懼怕  
逃往重慶府地面躲住本司差皂隸王勝賢緝拏間有

堂弟張淮與舍人程暹遇見捉回解送楊愛處責打三十發與伊父王志領回本月初五日有民人宋胡赴本司告稱民人李源搶虜家財本司差總旗餘丁朱留拘拏間有李源逃往伊妻兄裴椿家藏躲裴椿不合將李源藏匿在家隨又轉送逃避本月初九日有土民謝武赴本司告稱被民人王懷智勒索銀兩等情楊愛令已故儒士王瑩男王坐拘審有王坐不合索要謝武金一錢被伊告發楊愛將王坐送長官程善勘問本月二十

八日朱留緝獲裴椿捉送楊愛處追要李源不獲楊愛不合喝令皂隸楊景亦不合聽使用棍責打二十省發寧家本年六月初三日王坐弟王均要赴本司訴理有把門皂隸羅庸阻當王均不合將羅庸叫罵因而互相採打喧鬧楊愛聞知將王均捉拏到官責問王均倚父王瑩曾教楊愛讀書將伊毀罵楊愛發怒喝令皂隸趙文林亦不合聽依責打二十大棍趕出將王佐追贓給主問擬發落至本月十六日王均因打傷重在家身死本



月二十日裴椿亦因傷身死本年七月二十五日有裴椿妻何氏因夫死無人養贍亦行自縊身死本月失記的日王景德因患瘟疫在家病故本年八月二十八日楊友因往干溪莊所經過楊愛獵場捕得鹿一隻楊愛恐伊侵占獵場差皂隸趙文良等拘山鄰周克義等審問不曾侵占當即回家楊友疑是楊愛令趙文良等謀害當赴伊叔楊耀並頭目蘭希純閻允亨程善說知前因楊耀等詢問楊愛委無謀害情由勸諭楊友回家訖

本年九月十六日弟張演因伊妾秀真在家炒鬧要得責打本婦氣忿在於茶房內自縊身死本年十一月內楊愛差長官何熹舍人李勲齋本赴京行至南陽府何熹等因與越熙雍舊識前去探望越熙雍整理酒飯相待何熹等喫飲訖就行赴京將本投進本年十二月內向崧陳敏馮鑰因彼處過活艱難告回原籍當差一應文案交與馮暉收掌本月日期不等楊友緝知伊使女三真玉真俱與家人石朝祖通姦要行追究石朝祖逃

走不知去向三真玉真懼罪潛於後房內自縊身死又有伊使女勝娘亦與家人王祖師通姦楊友遇見當時用鎗戳死本年失記月日有本司同知羅宏下家人谷雲南即苟雲南因結構岩底等寨蠻人搶奪土民羅興富等家財事發本司捉拏監禁有何楫在監教唆苟雲南妄認係偏橋衛軍役又替伊寫書一封寄與土民蘭澄借銀打點被羅宏家人楊卿搜出前書具告本司行查明白將苟雲南量情責罰發與羅宏收領成化二十

年正月內長官素機男素瑩應當本年分里長不合將  
甲首呂定走遯馬匹騎損倒死被呂忠告發本司行提  
素瑩監追價銀買補馬匹走遯就行釋放本年三月內  
楊愛將銀一百兩差張淮前去雲南收買寶石等物有  
張淮買得各色碎寶石七件犀帶三條並孔雀藥餌回  
家交與楊愛令人辦得寶石犀帶有假止留孔雀藥餌  
算銀五兩將寶石犀帶令張淮領回變賣價銀九十五  
兩送還楊愛收訖本年七月內田忠病故伊妻冉氏問

田貴討要先年借去銀兩段匹不與將情赴播州長官司告乞追給本司委署吏目事仁水驛驛丞李鑑審得田貴係遼東安置人數呈送本司批差老人楊廣宣與弓兵閻鄭遞送綦江縣轉遞遼東都司查發安置楊廣宣閻鄭等各不合通同在家延住本年八月內楊友因與楊愛不和纔將伊弟楊敏楊啟並妻妾家財搬往安寧住過止留楊敷在楊愛處撫養本年十二月內本州僧綱司都綱智全副都綱烟徽各患風疾不能舉動有

今在官僧人智和未在官僧人永章各不合要得營求  
保任前職對本司署印僧人可用央說前情可用不合  
聽允慮恐該部叅駁捏稱智全炯徽俱各病故智和永  
章相應任職等詞具申宣慰司有楊愛明知智全炯徽  
見存不合朦朧具結將智和等申送四川布政司轉送  
禮部蒙將智和除授都綱永章叅查未報俱遇蒙成化  
二十一年正月初七日赦宥楊愛又不合不將勅書進  
繳楊友何熙慶姚鑑王裕何文楊崙智和永章可用又

各不合不行將情首官改正吳慶長壽黃保福僧義保  
九保小進保大朱保元保曾保王壽何宸玄大進保唐  
奴福庸范蠻羅保福元觀音張沅何勝昌王福善宋慶  
祥王永貴石超祖張保吳誠四保張永福楊善琴童王  
慶仁壽李馬龍章各又不合不行首官定奪弟張洪與  
趙氏又各不合仍前苟合住過劉淳先已問革又不合  
時常到於本司替寫文書劉壽劉鑑郭福亮張順各又  
不合仍在本州縣住不行回還原籍當差本月失記的

日蒙巡撫四川副都御史孫某查得本司申稱播州長官司副長官李昂得患風疾正長官王炳先已病故伊男李勲王墳俱該襲替案行川東道轉行本司查勘如果相應徑自具奏本司查得李勲王墳俱係應該襲替兒男遵依案驗徑自具奏未曾襲替本月二十八日梁章等挑擔鐵器經過本驛門首有驛丞王贊看見要行捉拏着役梁章等抗拒不服反將本官辱罵王贊不甘具申本司批差頭目何熙恭拘拏間本月二十九日楊



次定四庫全書

說前因有陳源楊大各不合許允接受前銀就替弟張深將銀二十兩玉連環一副駝絨一匹直銀二兩銅相帶一條直銀一两送與宋良又將銀二十兩金相寶石滿冠髻一箇重九錢金相寶石掩鬚一箇重一两一錢送與顏珪又將銀三十兩送與周從鴈央浼各人到楊愛處方便有顏珪宋良周從鴈思得弟張深先已追贓問結不當監禁各不合接受前項銀兩等物稟知楊愛將弟張深保領回家本月十二日弟張深訪知三真在

伊父家躲住又不合使令已故家人陳奴將三真強奪  
來家姦占為妾本年三月內本司差長官楊玉管解馬  
匹赴貴州布政司交割給軍騎操該司具本令楊玉領  
回起程間楊玉因患傷寒病證具告本司轉差黃平安  
撫司同知楊鼎頭目張檜代替齎進楊鼎張檜各不合  
依聽頂名齎本慮恐中途脚力難討各騎長行馬一匹  
到於重慶府上船行至南沱驛被風打破船隻前馬淹  
死楊鼎等得人救出將本齎進訖本月日期不等有楊

友與劉大榮因見年久不曹征進各又不合將原領官布五百匹通同侵欺陸續賣與過往不知名客人共得銀一百五十兩將二十兩分與劉大榮其餘銀兩楊友盡收入已本月失記的日有楊愛因見伊父原立坊牌年久損漏重新脩飾思得先奉勅書內有以旌爾義等字樣就於坊牌橫額添寫旌義之門四字本月初三日楊愛思得何楫費用係應該給主之贓例該追給何楫不肯承認反行辱罵有楊愛不忿又不合喝令皂隸李

神亦不合聽使用大棍打訖三十至本月初五日何楫  
因打傷重身死本月初八日何熙恭拘提梁元等到司  
楊愛因怪梁元等躲避差役辱罵官長喝令皂隸苛兆  
亦不合聽使用大棍各打四十當令戶首梁黃領回本  
年四月十二日梁元因打傷重身死本年月日不等有  
梁元男梁瑀梁三梁鍾及伊弟梁隆因患瘟疫病證陸  
續在家病故本年閏四月十二日有楊輝妾貫氏因在  
桃溪莊住坐被李用之手執腰刀一把將本婦房門挖

開進入偷盜間家人梁成玄知覺登時用鎗殺死次日  
早貫氏到於楊愛家說知前情將屍擡出召人識認有  
李鑑圓恐怕楊愛追究不敢認領就擡往地名蘿壁坎  
埋訖本年六月內有頭目柳靖男柳春因與土民杜齊  
賢爭奪水槽被杜齊賢將情并柳春調戲父妾素氏等  
情具告本司行提到官問擬發落訖本年七月內唐王  
要買壽器聞知越熙雍曾在播州教書本州出產紫杉  
材板差校尉張琳將銀五十兩前來本州收買及分付

越熙雍寫書一封令伊男越美同張琳送與楊愛託伊  
主張收買堪中材板楊愛就将前銀照依時價轉買紫  
杉板二副交與張琳帶回訖本年八月內是淵與弟張  
洪張深張演男張采要謀殺楊愛密與楊友說知楊友  
喜允淵因俞溫素與楊愛不和對伊說知前情俞溫不  
合聽允本月初七日淵令已死軍丁黃成叫朱留到於  
淵家樓上說與謀情就将箇銀三十兩交與朱留黃成  
言說你若將宣慰謀了我再問宣撫討銀一千兩好田

莊一處賞你等語有黃成朱留各不合聽允接受前銀  
淵又令男張采取出雞一隻酒一壺刺血對天立誓飲  
酒各散因無方便一向不曾下手後淵遇見俞溫說起  
前情俞溫慮恐事發連累推託不允本年九月內淵使  
女菊花與雇工人馬奴各不合私自通姦本年十月初  
八日夜有長官程善被賊人周師偷盜銀臺盞等物轉  
寄與江西客人鄭彥林藏放程善緝知具告本司行提  
間鄭彥林隨將銀臺盞等物送還程善收訖本司將周



師等問擬發落本年月日不等有湖廣丹章苗首苗老  
平帶領苗賊攻打湖廣翁弓翁牙寨又將安寧所管平  
加并平茶公羊地五凱它凱塘五寨放火燒毀房屋虜  
去人畜有寨長香保與總旗謝從祿等報知楊友討軍  
策應楊友要得乘機掣取土軍到彼守備有徐泰馮璧  
劉大榮與頭目楊光明侯正綱駱慶隆袁准趙政趙榮  
各不合撥置楊友捏稱苗老平僭號稱王大聚苗衆圍  
困丹溪等堡復來攻打本城軍寡糧缺陷在旦夕危亡

莫保等詞徑申各干上司蒙鎮守巡撫巡按官行仰四川都布按三司轉行都指揮僉事楊剛即楊綱右叅政謝士元僉事陳璉會勘間陳璉丁憂去訖改委副使翟庭蕙會同勘報楊友又不合故違巡撫孫都御史奏准事例輒將前詞具本差頭目何廣齋至貴州舟洞鋪遞奏有重安長官司將楊友徑奏情由具申本司楊愛遵依前例差頭目姚三即姚善明沿途挨查到於河南地方失記名鋪內將前項奏本取回差人齋赴巡按四川

都御史劉某處行令分巡分守等官查勘一向未報本年十一月內有楊愛批差頭目猶瑾家人楊昭往江西吉安府廬陵縣仁塘村緝拏強盜周鐸陳華不獲楊昭等在於吉安河下搭船回還遇見今在官民人曾循道亦在彼處搭船楊昭等詢問曾循道說稱諳曉陰陽風水要往湖廣等處與人看地有楊昭對伊言說我家老宣慰葬後人說風水不利你與我同到本州尋得好地遷葬自有相謝曾循道聽允不合越關跟隨楊昭到州

楊昭與楊愛說知前情令伊四散尋擇好地一向未回  
本年十二月日期不等有土民楊本宗告稱宣撫司吏  
羅昂將伊堂弟楊章強占在家及土民朱源告被本司  
吏杜忠厚占奪墳地楊愛行提羅昂杜忠厚到官追出  
楊章給與楊本忠領回將墳地斷還朱源就行問擬發  
落有楊友差禁子黎辰勾喚在逃土軍沈進黎辰不合  
索要沈進綿布四疋八已又差健步苟章勾喚逃吏馬  
輔有苟章不合索要馬輔銀二兩五錢綿布六匹八已

被沈進馬輔告發楊愛行提黎辰苟章到官各追布匹銀兩給主亦行問擬發落成化二十二年正月二十一日有宣撫司守堡總旗蘇章失火燒毀城樓一座延燒土軍二十二家楊友差人拘拿蘇章到官令皂隸羅犬責打三十發回守堡後蘇章患染黃腫病證身故本年二月內有宣撫司軍人侯玉因被戶丁侯明挾騙家財將情赴楊愛處告理當差頭目年縈拘拏侯明到官問擬明白發落訖本年三月內淵訪知楊愛要去雷水祭

掃密令朱留等前去地名三木埡伏候仍令馬奴已死  
弟三奴在彼幫助三奴對朱留言說你每不要害怕我  
家長先年用藥毒死楊孜至今不曾發露不期楊愛往  
地名冉家上墳朱留等各散回家本年四月內淵訪知  
楊愛要於本月二十五日去會川莊所請客飲酒仍令  
朱留等各帶弓箭前往地名箐川崖上等候間湘川驛  
報稱南京戶部郎中黃東山來州公幹楊愛走馬回還  
迎接朱留等倉卒不能下手本月失記的日本司為慶

賀事照例將馬二匹批差安撫猶瀟頭目牟麟祥與弟  
張演解赴貴州布政司交割給軍騎操該司就將給過  
緣由具本令猶瀟等領回齋進起程間猶瀟為因該管  
地方夷情張演等各因患病具告本司有楊愛不合准  
聽轉差何熹向崧與頭目何子淵齋進何熹向崧何子  
淵各不合冒頂猶瀟等姓名齋本赴京本月二十六日  
有楊友批差總旗趙昱齋捧本年冬至并成化二十三  
年正旦表箋赴本司轉送四川布政司類進有趙昱不

合在家延住本司不見齋到差禁王成母鄭尹二前去  
催促趙昱方纔到司有何熙慶并該吏楊崙羅仁壽查  
得趙昱違限月久稟知楊愛將趙昱發本司經歷金順  
處問擬違限答罪的決訖仍令趙昱將表箋齋進趙昱  
因見遲違不肯前去本司批差長官趙經代伊齋送布  
政司就於趙昱名下追箇銀一十四兩給與趙經收作  
盤纏并雇人檣表等用本年五月內有遼府失記名孫  
儀賓家人孫全央華陽縣民人李遵前來本州問楊愛



收買黑鉛楊愛明知趙月升家寄放黑鉛一百擔係應入官之物不合輒將前鉛隱情賣與孫全得銀一百三十兩入已本月初八日容山長官司將何清侵尅錢糧等情具申四川布政司蒙行仰宣慰司徑自查追有楊愛明知何清係是土官例該奏請不合故違輒便收監追併本月日期不等節蒙巡撫等官行催楊綱等將楊友所申賊情作急勘報有楊綱等纔方行委重慶府衛指揮使徐繼通判孫佐與同知羅宏督同楊友等前去

各寨體勘本年六月內楊綱謝士元到於本州楊友差  
苗人頭目總六等齋文赴各官處投稟有謝士元嗔怪  
楊友申報賊情多有不實當將總六責打四十發回本  
司楊友不忿對徐繼等言說三司大人不肯親臨勘報  
反將齋文頭目拷打不知意要如何徐繼等用言勸解  
本月二十日是淵與弟張洪張深男張采并何清未到  
官弟何源何淳謀說顏珪常跟着宣慰人難下手莫若  
先將顏珪殺了有弟張洪張深男張采并何源何淳各

不合聽允本月二十三日何淳令伊家人馮三叫伊今  
在官妻弟馬隆并原跟何清民人黃寒到於淵家言說  
今宣撫封銀一百五十兩討人要謀顏珪你每若肯用  
力將這銀子充賞就將箇銀二包與馬隆黃寒省過各  
不合許允有男張采將身穿青布褶一領銀二兩六錢  
鐵鞭一條鏢一根交與馬隆令伊雇人併力又將銀五  
錢交與黃寒做神福有馬隆等四散尋人彼時有江西  
民人傅禿子不合越關在於本州買賣馬隆與伊說知

前情請伊同做神福喫酒傳禿子又不合回說你得方便却來尋我不去喫酒馬隆又與軍人許先石關羊謀說前情各人懼怕俱推託不允本年七月內楊友將伊父妾玉香取去安寧轉嫁與湖廣都司都指揮僉事許英為妾有玉香父張順不知改嫁情由疑是姦占伊女為妾本月初八日翟廷蕙亦到本州次日翟廷蕙與楊綱謝士元同到楊愛家看祖訓碑楊愛安排筵席相待令人喚樂戶劉鑑郭福亮又各不合依聽到伊家彈唱

勸酒至第三日翟廷蕙詣文廟行香楊綱謝士元陪去  
行禮已畢有本處軍民照依年例迎賽壁山土主裝扮  
義夫節婦過街人馬喧鬧男女混雜有楊綱謝士元翟  
廷蕙自合迴避各不合在本學儀門下坐省楊愛因見  
各官坐久安排卓面四張掣到彼處要行勸飲各官因  
見訓導楊禮詞色不平就各散回不啻飲酒有楊綱訪  
知本州有桃源洞邀請謝士元翟廷蕙到彼遊翫飲酒  
作詩至晚纔散後有徐繼孫佐勘得苗老平等攻燒平

加等賽是實別無僭號稱王等情呈報楊綱等處楊愛  
因與楊友不和捏稱馮暉刻契引惹生釁等情呈報各  
官致蒙准信通將前詞混同徐繼等勘過緣由開報鎮  
守巡撫等官蒙轉行各官將馮暉等提問仍行楊愛將  
在逃土軍督發前去安寧守備有謝士元等各又不合  
一向因循不曾施行本月初十日有楊愛生子朱留王  
成密對淵說如今宣慰有子那事快莫做了是淵回說  
既是如此先與你的銀兩我也不取切莫漏泄朱留等

應允是淵回家慮恐各人漏泄前情密與弟張深張演男張采同謀要將朱留黃成等殺死致免漏泄有張深張演張采等各亦不合聽從本月十一日晚弟張深張演男張采詐說要往朗山莊上取米帶同黃成三奴跟隨前去行至洪江大箐張深又不合將黃成捉去林內用刀砍死將頭丟棄洪江水內被水推去不知下落張演張采在傍不曾下手次日晚有三奴來到地名水磨塘遇見朱留說知黃成被殺情由就約朱留逃出潛躲

有張深等隨後趕去將三奴捉拏回去當夜一更時分是淵將使女菊花家人壽童趕出叫三奴進屋裏用索勒死令伊兄馬奴等擡出牆後埋訖朱留懼怕通將前情具狀赴本司首發差人緝拏間是淵與弟張洪張深張演男張采聞知事發就行脫逃經過謝家金竹等寨恐怕本司差人追趕又對各寨苗人詐說宣慰見請四川三司在州點集軍馬要來殺你各苗有苗人聽信聚集人衆把截道路本月十七日淵等到安寧城內思得



事已發露密與楊友商量要行誣奏楊愛遮掩前罪楊友許允淵又令伊寫書一紙寄與俞溫開稱弓長兄弟到備道閣下所舉頗似丈夫之志其後又更初心不過首鼠兩端我與弓長商確大事已遂何不圖富貴等語封訖令伊家人唐寒不合依聽齎與俞溫被把渡舍人毛鉉捉獲連書解赴本司本月二十三日楊愛差人押帶朱留與黃成義兄黃鼎到於洪江大箐尋見死屍一軀無頭有黃鼎言說黃成左腿有一箇瘡疤當有里老

人等將屍翻轉令黃鼎看驗黃鼎看得本屍左腿委有  
瘡疤認係伊弟身屍放聲大哭又於淵家牆後尋出三  
奴身屍驗係勒死回報本司行委經歷金順審供明白  
將朱留等監候問擬楊愛通將前情具奏抄送兵部轉  
行都察院案候間本年八月初四日是淵寫書一封楊  
友將鍍金相犀帶一條交與皂隸韓唐亦不合依聽前  
去貴州請熟識舉人路義轉浼彼處鎮守巡撫等官奏  
稱苗夷猖獗及楊愛把截道路等情行至中途被安撫

宋輅捉獲連書帶解赴本司楊愛將書拆開驗係淵親  
筆將帶及原書收訖另行謄寫一封差家人謝周假作  
楊友伴當送與路義有路義得書不合依聽前去彼處  
鎮守巡撫官處央說前情俱各不允路義就行寫書一  
封與淵說稱安寧人至始知執事避難而行務要搜根  
剔齒將本官違法事件備奏一本方免此患不然恐落  
姦人之手等詞又寫詩一首說稱兵機本稿屬都堂此  
老戇愚沒主張等語寄與楊友俱交與謝周帶回楊愛

開拆前書備抄轉呈四川鎮守巡撫等官處俱蒙行仰  
分巡分守官員勘問未報本月十三日有父張鈺令家  
人李奴叫馬隆到家不合對伊言說淵等在於安寧聽  
信你每商量的事上緊做了罷馬奴許允倉皇出門間  
被軍人何旗捉獲送司審出前情將傳禿子等拏獲通  
發經歷金順問理追出贓物在官是淵唆使楊友作急  
進本楊友又不合要誣楊愛等重罪將情添捏楊愛差  
旗校趙文良等一百餘人暗行謀害有伊知覺赴叔父

楊耀并諸親長處說知前情楊愛又將舍人何楫陷死  
長官何清頭目柳春健步苟章等捏故監禁俞溫田豐  
王標等挾制在家止有徐泰馮暉劉大榮等在城備禦  
又被楊愛趕逼及用巫師魔魅縱令長官張通扇惑苗  
夷反叛築城未完欺罔誑奏及差頭目謝淵家人羅添  
鳳等四路把截有參政謝士元都指揮楊綱副使翟廷  
蕙前來體勘被楊愛與顏珪將金銀買屬各官朦朧叅  
駁及將勅書出則背隨擺列儀仗騎坐金鞍私造火器

旗纛金瓜鉞斧常調總旗趙旭等號為圍子手侍衛親軍詐傳勅旨擅立金龍門又打金印內鑄上輕車都尉章五字及將素瑩黎辰羅昂杜忠厚侯明捏事監禁欲陷其死并將苟章侯明一家抄劄又將裴椿及梁元梁瑀梁隆梁三梁鍾各打大棍一百俱各身死令舊吏周從鼎巫師侯玉等魔魅馮暉身死徐泰右脚腐斷強捉李用之往庶母貫氏莊居殺死圖賴貫氏與李用之通姦貫氏親往伊家辯理楊愛懼罪陰令程善闡允亨用

財買免又將田貴捏故令老人楊廣宣閻鄭等解到問  
頭鋪殺死又將父妾蔣真馬真欺姦與馬真姦生一男  
密地壓死令唐奴收埋擅開尚寶家等處鐵冶二十四  
處令偽太監曾保燒煉熟鐵專造軍器擅置機院將民  
人趙其江文仁張川保等一百餘戶充機院織匠以偽  
太監王壽管領織造龍鳳蟒袍又於白田壩擅立商稅  
局起調軍馬三千餘衆假以水西送喪陰欲演習武藝  
擅立教坊以偽太監吳慶掌事以良民張永壽吳從義

為左右局使抄捉良民龐兆期女勝真福真等一百餘  
名充女樂令樂戶劉壽教習雜劇每遇節旦楊愛身衣  
龍袍夫稱國主天主妻稱地主擅立局院以偽太監黃  
保管孳牲局何宸玄管馬院大進保管大廚小廚二局  
又將侍女宋真強姦本女不從楊愛剝去衣服綁縛在  
地將黑雄狗百般陵辱以致自縊身死又將各里人民  
科派上戶八兩中戶下戶不等倍剋入已各民稅糧設  
計攬納多收折色銀兩軍民人等有犯贓罪每銀一兩



追銀二兩及令偽太監王壽驅役良民康冉唐一蕭榮  
祖等巧打二龍戲珠金盆織造龍袍其卧房則有金龍  
繞柱珍珠簾幕獨占家財將父原收金五千兩銀一十  
五萬兩并珊瑚樹十株珍珠簾四幅玉圭二笏走盤珠  
二枚寶石三斗珍珠四斗并金玉違禁器物及養老莊  
田子粒六萬餘石馬五百餘匹牛二千餘頭獵場茶園  
漆林杉山猪羊等項不計其數等項虛詞令淵開寫奏  
稿是淵說這等情詞不足聳動朝廷莫若捏他妖言詩

句顯出他不軌之跡楊友言說你就替他做兩首詩句  
寫在本上是淵明知有例造妖言者正犯處死全家發  
煙瘴地面充軍隨住又不合故違捏稱楊愛曾言我夢  
騎龍上上帝謂我曰南方帝子來也楊愛又曰人相  
我有天分我若得志共享太平又作詩曰陰雲終日蔽  
長空咫尺衡門有路通霹靂一聲震天下南方須起赤  
鱗龍又曰古今豪傑貴謀身虛度光陰二十春不向蜀  
中興事業却來俯伏屬豬人以粉板寫之掛於睡房金

龍柱上等語添入本內寫成奏本及將遙振錯寫作搖  
振財輕義重錯寫作財輕重重字樣擅用本司印信令  
楊光明齋赴通政使司投進抄送都察院蒙本院奏差  
刑部錦衣衛堂上官前來四川會同鎮守巡撫巡按官  
員勘提及將楊愛所奏情詞行移各官併勘有弟張深  
又不合誣奏親王及誣楊愛等重罪仍將楊友所奏虛  
實情詞添捏楊愛僭擬朝廷修立五門牌扁正庭僭稱  
宮庭內立蒿呼門僭設金水橋睡房貼金描畫卧床雕

刻龍鳳身穿星斗龍鳳衣服於玄妙觀設本命金龍牌一座與萬歲牌並立差頭目趙泉將銀五百兩金五十兩金帶一條送與謝士元又令顏珪將銀盆一口銀三百兩金帶一條銀相了事一副送與楊綱及差頭目閻晟將銀五百兩金五十兩金帶一條送與翟廷蕙楊愛設宴相待各官每席送金花一朵伊妻田氏用綵緞針線靴鞋金盞銀臺贄見俱各接受又差何熹李勲等潛往唐府交通本府宴賞何熹等回還備道王待厚意楊

愛潛為奸計令楊鼎帶戰馬二匹進貢唐王有本府亦  
差校尉張琳舍人越美送楊愛密書一封大小書五部  
不知是何文籍武書彩色表裏二副楊愛叩首跪拜接  
受與張琳等設宴回寄唐王密書一封與張琳越美每  
人銀五十兩又科銀一萬餘兩預備夫錢令偽太監長  
壽王壽家吏王從仁等造辦軍器又差頭目王杲收買  
羅緞以備賞勞變亂舊章將舍人王墀李勲徑自奏  
請襲職體得曾循道能觀天象諳曉兵機迎請到州拜

作軍師日省兵書夜觀星斗又於雷水塑立楊輝神像  
龍章鳳式見存又差長官馮琪舍人楊才來京打聽消  
息擅開銀場連年煎銀萬千餘兩黑鉛數萬餘擔起集  
人夫每年砍花杉板一萬餘副一半買屬來往官員一  
半發與蘇州等處變賣偽太監王景德要赴京陳訴楊  
愛捉回凌遲碎剮及怪舍人程暹不拏王景德故縱強  
盜周師等將伊劫掠及將伊貶去廣東安置又怪堂兄  
張淮跟趕王景德遲延令伊領銀一千兩前往雲南收

買石澤生象張淮止買得寶石犀帶等物回還楊愛收  
訖仍將張淮追銀一千兩貶去地名赤水萬里箐羈管  
閑住又因布政司差人齎銀前來買金楊愛將銀收在  
伊府令長官楊廣等科追股實大戶赤金二百餘兩加  
耗四十餘兩楊愛只將低金混鎔解赴布政司煎拆楊  
愛反將伊追陪淨金四十兩又令伊領銀二千兩收買  
石澤等物止買得珍珠寶石貓精等物回還楊愛又行  
杖併追銀一百兩又指稱先年解金秤拆為由令校尉

楊辰高泰擒拏嚇騙赤金九十九兩又要牢禁陷害只得將大紅紵絲一疋分與內官羅保託伊將銀一百兩送與伊妻田氏又將銀一百兩送與伊妾田氏及將玉條環一副銀五十兩送與長壽又將銀十兩送與陳源託伊將銀三十兩送與顏珪又將銀十兩分與民人楊大託伊將銀一百兩送與周從鼎方纔姑容楊愛奪占山林每年起集人夫遇春採茶萬餘擔遇夏米價高貴起夫分運子粒往重慶等處變賣遇秋至冬差黃保等



總督官目子弟打捕猪鹿馬熊一萬餘隻小獸麋鹿不記其數運回總府又倚買金為由於播州長官司科銀二千餘兩親管二十二里科銀一千餘兩令家吏李孝思追收孫全將金五百兩問楊愛買黑鉛五千擔差頭目閻佑運至臨河交付又將粮價一萬兩官布五百疋俱剋落入已追過贓錢罰贖等項每年追有一二萬兩本年六月內將蘭希真文錦韓璽追有三千七百餘兩自楊愛管事以來約有萬萬餘兩又將民人趙高僧幼女

王真強檣入府姦宿為妾又因進貢馬匹科苗銀一千五百餘兩又將埋沒軍役一千五百名擅編園子手設立總旗六名楊善林楊瓚楊源趙旭朱鎮郭聰等管束偽設校尉千戶八名李弼張朋李聰羅琪趙溫良聶俊何廣王鑑等專一擒拏斬殺又將各處田土編成府分每府設一偽太監一都從并都官都保提督及開福僧王壽等一十八名俱係太監趙玉猶鑑等一十八名俱係都從苟郭等六名係牌首吳從義張永壽係局使羅

馬僧係局長李福壽呂何係提領祿壽羅保等七名係  
內官何文係屯田司令等項虛詞及錯寫唐府係湖廣防  
隅傳導沿階鉗封等字俱各差訛開款具本齎赴通政  
使司妄奏有何清因恨楊愛將伊監追糧價亦要誣伊  
重罪將楊友與弟張深所奏虛實情詞添捏田貴前來  
取討原寄珍珠玉梳珠簾龍劍金銀等物楊愛主令長  
官趙經將田貴擒拏令閻鄭等解至悶頭鋪打死假作  
脫逃及將伊男何楫痛打一百二十棍不死當夜禁子

羅欽趙文林用索絞死又要將伊打死只得將銀盆一口憑頭目楊大簡送與顏珪又將水田一段請吳三元送與長壽方得性命伊弟何洙帶引繼男何高保何名赴京伸訴楊愛主令毛釗前來截殺將何高保何名并鞍馬一副盤纏銀十兩盡行劫回未知存亡智和永章交結長壽號曰國師楊愛見仁懷儒溪二里出產石青石綠擅取作親管里分遞年仰傳禧追收銀兩黃蠟綿布入已本州夏秋稅糧每石止用面銀六錢楊愛每年

委官目一人追苗銀二兩尅落花費等項虛詞及稱楊  
輝詐作蠻人攻破地方將稅糧停徵三千一百餘石追  
收尅落入已等詞令伊弟何洙亦不合依聽出名具本  
越關赴京妄奏俱抄送都察院蒙將弟張深解回何洙  
給引照回聽理間本年九月內淵聞知楊愛將淵等謀  
害事情奏發懼怕上司差人挨拏哄誘楊友指以赴京  
伸訴為由帶同劉大榮等并楊友原分得火者張沅何  
勝昌王福善宗慶祥王永貴石超祖張保到於貴州地

方潛住後聞鎮守等官差官沿途跟趕又到湖廣荊州府地面縣住打聽得都察院已將弟張深遞回聽勘楊友懼怕遞發不敢前進又行捏稱楊愛分投差安撫宋韜猶瀟長官張經毛釗舍人李勲韓清等調所屬軍兵三千五百餘衆在於鎮遠荊州沙市等處駐劄邀截及用金銀買囑巡捕等官容情不舉又增調軍馬四路遏截密行謀害等詞具本差頭目彭宣齋奏仍將前詞具狀令楊光明抱赴欽差官員處妄訴是淵思得楊輝先

年分與楊友楊敏等火者并蟒龍衣服慮恐楊愛訐出  
又教楊友捏稱楊愛將火者張沅等一十九名及本家  
織造蟒龍衣服二件分與伊兄弟服用故將數內吳誠  
等拘留不放等詞具本連蟒龍衣服二件并跟隨在彼  
火者張沅等七名俱令彭宣等解進有劉壽宋齊賢劉  
守堅黃鼎張淮等各將楊友欺姦父妾霸占田土侵剋  
官布并淵與弟張洪張深張演男張采謀殺人命盜取  
鋪陳侵欺官錢等項事情各赴播州長官司首告站戶

羅昂因被楊友連年占役不合捏稱楊友將蘇章捉去用大棍打一百即時身死等詞具狀赴本司妄告有本司署司事舍人李勲又不合輒將各人首告情詞添捏弟張深先年尅落宜賓富順二縣糧銀等詞混同開款具本奏發楊愛亦將朱留原首淵等謀害情詞並何清等侵欺軍糧等情具奏有草塘黃平二安撫司安撫宋韜羅贊真州容山重安餘慶白泥五長官司長官鄭旭輪張經張通楊玉毛釗亦各將楊友何清等奪占地方



侵盜錢糧激變夷民殺死人命等情各具本奏發楊愛  
聞知楊友赴京仍將前項情詞及添捏楊友欺姦父妾  
玉香綵鸞等詞混同具本妄奏俱蒙都察院抄詞轉行  
原差官員併勘蒙差人將淵與楊友等緝拏前來發湖  
廣都布按三司委官都指揮僉事房昂等撫提一千人  
證到官逐一責對明白吊查各起文卷相同通將審過  
緣由連人犯呈解前來審得楊愛執稱自幼喪母家財  
俱係庶母田氏收掌若有金銀違禁器物田氏俱與楊

友楊敏兄弟所奏珍珠簾走盤珠玉圭等物委的並不  
曾見楊輝存日將金銀等物均分見有分單存照數內  
違禁之物情願一一入官不繳勅書是實並無擺列儀  
仗及私造應禁軍器金瓜鉞斧等項蔣真馬真俱係楊  
輝使女馬真先已病故楊愛并不曾將蔣真欺姦生子  
唐奴亦不曾替楊愛收埋姦生之子劉壽執稱楊愛令  
伊教習雜劇是實並無抄劉良民婦女充女樂及身衣  
龍袍及事內人證俱執稱勅賜牌坊係楊輝起立楊愛

止是修飾添寫旌義之門四字不曾詐傳勅旨擅立金  
龍門及打金印內鐫輕車都尉等字蟒龍衣服係楊輝  
存日令人於南京等處收買本州原有鐵戶八十六戶  
逃年自行煉鐵營生楊愛並無擅開尚甕家等處鐵冶  
二十四處折糧銀兩係楊輝存日准行楊愛不曾攬納  
多收折色馮噉徐泰俱因病身故並不係楊愛令侯玉  
等魘魅身死楊愛本家養有牲畜馬匹俱係家人李孝  
敬等看管遇有造器四起蓋房屋俱係雇倩人匠并

無擅開大廚小廚等項院局播州長官司原額商稅鈔貫逐年責令頭目戴景清于福宗照數徵收春秋祭祀買辦器品作數支銷楊愛不曾在落人己亦不曾在白田壩擅立商稅局康冉平日止是打造粗糙首飾趙其江文仁止會織造布匹蕭榮祖止會琢磨假玉作網圈之類並不曾打造二龍戲珠金盆織造龍袍本司受理一應詞訟止是照依夷俗講斷有願納米贖罪者責令或出牛羊或出麻布或銀一二兩凡遇一應公務作數

支銷并無多收銀兩入已安寧城郭俱已築完楊愛并  
無欺罔誑奏及楊愛親叔楊耀執稱楊愛襲職以來遵  
守法度並不敢僭送夫稱國主天主妻稱地主止是頭  
目以下因見長壽顏珪有寵以此稱長壽為老爺顏珪  
為大人楊愛違例不令佐貳官封記印信是實用使之  
時俱令羅宏知會並不曾在於私家使用王景德病故  
身屍見存楊愛不曾將伊碎剮趙高僧女玉真見嫁土  
民王勝宗為妻楊愛不曾姦占為妾本司土軍除分撥

各司備禦見存一千三百名並無埋沒軍役亦無擅立  
總旗校尉千戶名目水田柳川等處俱係楊愛田莊並  
無設立屯田府分福僧等俱係楊綱楊輝闖割火者亦  
無偽稱太監都從名色田貴係播州長官司起解中途  
脫逃楊愛并無圖財謀殺曾循道止是尋看風水并無  
夜觀星斗楊愛因伊授業師越熙雍寄書替唐王收買  
材板並無交通情由唐王亦不曾賜與綵緞書籍綵鸞  
先已改嫁舍人羅昇楊友并不曾將伊欺姦又審得何

清王坐并梁瑀妻易氏裴椿弟裴林執稱何楫王均梁  
元裴椿係楊愛因公打死身屍埋葬已久不願檢驗蒙  
委忠州知州陳秉彝內江縣知縣陳銓各帶吏忤押發  
屍親黃鼎馬奴王志相驗得黃成無頭屍已潰爛衆執  
生前委係弟張深用刀砍死三奴頸有縊痕生前委係  
淵用索勒死王景德身屍渾全生前委因病故又委各  
官到於地名雷水看得楊輝塑像止是朝冠朝服並無  
龍章鳳式又蒙委湖廣三司委官會同四川三司都指

揮劉昇右布政司李清僉事馮寧親至楊愛住宅內看得并無五門牌扁及嵩呼門金水橋中庭扁作忠孝堂亦不曾偕稱宮庭睡房并無貼金猫畫及金龍繞柱卧床亦無雕刻龍鳳其祖先堂承恩堂并小廳左右角門俱有飛簷轉角放印亭重簷圓頂楊愛并伊伯母田氏住房及中廳前俱有月臺臺下各有水池池中各搭石為橋周圍俱有青石闌干俱係楊昇存日起蓋西邊又有玉皇祠中塑聖像左右二柱各有木刻金裝龍一條



係元朝天統元年楊愛六世祖楊嘉貞起蓋圖畫貼說  
呈報前來又審楊耀并伊親族及楊友母舅田宗善同  
詞執稱楊愛祖父以來並無珍珠簾走盤珠玉圭等項  
是的楊孜委因傷寒病故不是淵等用藥毒死看得長  
壽曾保黃保義保大進保王壽福庸吳慶福僧大朱保  
元保兀保俱各年老見患風癱癘跛等疾責令醫生崔  
永和看驗是實不堪起解可用執稱先於成化十八年  
八月初十日被賊人偷去度牒已行告官挨訪不獲及

審弟張深等執稱父張鈺風癱在床已成篤疾止有何  
清奏稱楊輝自正統十四年以後詐作蠻人攻破地方  
將稅糧停徵三千一百餘石連年追收尅落入已一節  
本司文卷散亂難以憑據另行布政司查報定奪除將  
長壽等暫發羈候貫氏等省發聽候將淵等研審明白  
實招罪犯外結得銀一兩直鈔八十貫招結是實張深  
等七十一名招同張通等四十名供同照出張采何源  
何淳馮壁劉大榮侯正綱素淮趙政吳誠四保張永富

楊善琴童王慶仁壽李馬龍章路義永章俱另行楊友  
楊愛原分金玉首飾器皿等物並楊友侵盜官布價銀  
一百五十兩楊愛賣鉛價銀一百三十兩原追張深等  
尅落金一百三兩九錢九分何清侵欺糧米六百九十  
三石八斗六升五合周從鼎宋良顏珪陳源楊犬接受  
張深銀共七十八兩玉連環一副駝絨價銀二兩銅相  
帶價銀一兩金相寶石滿冠髻金相寶石掩鬢各一箇  
張洪侵欺馬價銀一百兩鋪陳價銀一百八十兩及朱

留首出銀一十五兩張淵負欠李瑩地基銀六十兩嚇  
取王宗保銀一十兩張演騙取綦宣銀三十兩主無見  
在俱合追入官楊永原占劉永堅地基并楊昌福等水  
陸田地責令退還原主管業占役站戶孫羊等退出當  
差楊愛原奉勅書一道合追進繳追出智和原給度牒  
合送該部查銷楊愛遠式房屋石橋闌干行令拆毀改  
正弔來文卷發回各衙門備照議得張淵所犯除謀殺  
人造意並故殺雇工人威力主使人毆打致死等罪張

深除從而加功並誣告人死罪未決等輕罪外張淵合依  
造妖言者律斬張深依豪勢之人強奪良家女姦占為  
妾者律絞俱秋後處決楊友除本犯應死而擅殺等輕  
罪外依官物當應給付與人已出倉庫而未給付但有  
人守掌在官若有侵欺者計贓以監守自盜論四十貫  
律斬楊愛除因公毆人至死等輕罪外比依軍官犯罪  
應請旨而不請旨當該官律絞俱雜犯照例納米楊愛  
仍盡因公毆人至死本法每名追埋葬銀一十兩給付

死者之家張洪張演何清顏珪何熙慶俞溫劉淳趙氏  
劉壽劉鑑郭福亮張順王裕姚鑑何文楊崙小進保何  
宸玄唐奴范蠻羅保福元觀音長壽黃保義保曾保大  
進保吳慶福僧九保大朱保元保王壽福庸俱除草前  
罪名何清若奏楊愛令閻鄭等將田貴打死得實閻鄭  
合坐以謀殺人從而加功者絞今虛依誣告人死罪未  
決者律張洪依以威力主使人毆打致死若下手之人  
為從論減一等律張演依謀殺人從而不加功者律顏

珪周從鼎宋良陳源楊犬俱依受財不枉法無祿人一百二十貫之上罪止律朱留依卒謀殺本部五品以上長官已行者律俱減等各杖一百徒三年李勲依奏事詐不以實者律減等杖九十徒二年半荀兆楊景李神趙文林俱依聽使下手之人通減楊愛因公毆人至死二等律各杖八十徒二年馬隆黃寒傅禿子俱依謀殺人已行未嘗傷人為從者律減等各杖九十曾循道何洙俱依越度關津者律減等各杖八十何熙慶俞溫劉淳

王裕姚鑑何文楊崙趙氏菊花何燾向嵩楊鼎郭欽劉  
壽劉鑑郭福亮張順韓唐羅昂唐寒可用智和馬奴小  
進保何宸玄唐奴范蠻羅保福元觀音長壽黃保義保  
曾保大進保吳慶福僧九保大朱保元保王壽福庸楊  
綱謝士元翟庭蕙楊光明駱慶隆趙榮田豐俱依不應  
得為而為之事理重者律減等各杖七十張洪張演俱  
係張淵弟照依造妖言事例全家發煙瘴地面充軍隨  
住何清顏珪周從鼎宋良李勲何熙慶俞溫劉淳王裕



姚鑑何文楊崙向崧楊鼎郭欽楊綱謝士元翟廷蕙楊  
光明駱慶隆趙榮小進保何宸玄唐奴范蠻羅保福元  
觀音九保元保俱照例納米陳源楊犬苟兆楊景李神  
趙文林俱照例擺站各完滿日馬隆黃寒傳禿子曾循  
道何洙劉壽劉鑑郭福亮張順韓唐羅昂唐寒馬奴俱  
民人可用智和俱僧人各的決趙氏菊花俱婦人各單  
衣決罰長壽黃保義保曾保大進保吳慶福僧大朱保  
王壽福庸俱廢疾人依律收贖朱留係自首發田豐犯

在草前俱免罪張通程善王坐袁瑩戴景清于福宗侯  
王杜忠厚康冉柳春侯明李鑑圓黎辰趙琪蕭榮祖閻  
鄭年榮梁章裴林閻晟趙景楊昭王勝賢趙高僧楊大  
簡羅欽趙旭王瑱王標戴秉文趙文良羅仁壽張永壽  
吳從義龐兆期石關羊王志黃鼎易氏三真俱供明各  
還職役寧家還俗隨住趙氏離異歸宗三真給親完娶  
楊友係冒陞土官何熙慶係冒襲土官王裕姚鑑何文  
楊崙俱違例叅充人役顏珪係有贓吏俱革職役為民

叅照犯人張淵以邊鄙之夷民挾蛇鼠之小智教楊友以奪嫡使其兄弟相讎殺黃成以滅口致其身首異處捏造妖妄之詞中含譏謗之意張深謀害楊愛之時既同立誓殺死黃成之際又實加功姦占婦女欺壓良家誣奏親王肆無忌憚楊友本以駙童冒功授職姦淫父妾雖係草前彞倫之道有虧謀奪弟職輒欲殺害手足之情安在楊愛寵信所私踈遠骨肉何清雖係屬官不候奏請而輒提王均等固為有罪輒便因公而毆死張

洪署管驛事而侵盜官錢聽兄主使而毆死人命何清  
欲謀陞官而設詞以陷韓瑄張演欲扶庶孽而結黨以  
圖楊愛顏珪以刀筆賤役恃扶助私勞雖有贊畫革弊  
之勤難掩招權納賄之罪楊綱謝士元翟廷蕙官居方  
面百司具瞻體勘夷情雖無賄賂之私遨遊飲宴殊失  
表率之道及小進保何宸玄唐奴范蠻羅保福元觀音  
長壽黃保義保曾保大進保吳慶福僧九保大朱保元  
保王壽福庸俱係私自閹割人犯律該給親數內長壽

等一十名俱有廢疾九保元保俱有殘疾合無依律照  
例發落惟復解京再問定奪再照楊友楊愛構隙已深  
同處一州必致互相殺害伏乞聖明裁處緣張淵張深  
俱重刑楊友等俱情重人犯楊愛又係比附律條楊綱  
係軍職論功定議並與謝士元翟廷蕙俱方面官及節  
該欽奉勅情重者牢固監候奏來定奪事理未敢擅便  
除將張淵等牢固監候楊友楊愛照題奉欽依事理省  
發聽候長壽等羈候周從龜等照依見行並土俗事例

發落供明張通等先行摘發贓物候追完差官另解外  
開坐具本專差小旗武振親齎謹題請旨

題為禪補治道事河南清吏司案呈奉本部送准禮部  
咨禮科抄出巡按河南監察御史文貴題臣聞海宇乂  
寧本乎人君之致治人君致治採納臣下之建明大舜  
聖也淺近之言好察文王聖也芻蕘之語下詢恭惟皇  
上仁孝齊莊聰明睿知聽言納諫婉美舜文圖治保邦  
遠邁成景甫御極而華夷嚮風未踰年而天下大治斯

世斯民不勝慶幸臣濫竽憲職巡按無能謹拾地方所  
見有關天下可以小補治道拾事開坐具本該通政使  
司官奏奉聖旨該衙門看了來說欽此欽遵抄出送司  
除抑外戚以扶宗室等事本部承其餘起大臣以翊聖  
化等事係隸別部掌行抄單移咨到部送司案呈到部  
看得巡按河南監察御史文貴題稱要將內外大小問  
刑衙門今後但有問該准贖死罪囚犯除文武職官監  
生旗軍校尉勇士力士天文生等項仍照見行事例發

落其餘吏民舍餘匠竈僧道樂工人等一應准贖斬絞  
死罪及豪民犯該流罪竊盜犯該徒罪俱各免其做工  
運炭納米擺站等項悉發本犯原籍附近衛分充軍及  
民人誣告十人以上發口外為民舍人妄爭嫡庶官職  
侵奪卑幼產業發原籍為民者俱各免其遷徙就發本  
處附近衛分充軍並拏獲礦賊不分初犯再犯免其枷  
號徑解原擬都司衛所充軍等因臣等將所奏事件逐  
一叅詳明白開立前件伏乞聖明裁處緣奉欽依該衙



門看了來說事理未敢擅便弘治元年十月十八日本  
部尚書何某等具題本月二十日奉聖旨准擬欽此

計開

一編罪囚以足兵戎臣聞兵者國之所恃以為安者  
也充足精強邦家攸賴臣看得河南衛所軍士消  
耗十分已五六矣各處雖有清軍官員但以歲久  
人亡版籍更易百人之中清無二三見在揆之天  
下大抵皆然若不量為處置兵政何自而足查得

見行事文職官吏監生有犯枉法滿貫絞罪者充軍其餘軍職舍餘民匠等項犯該一應雜犯死罪者立功哨瞭運炭做工納米擺站等項發落切詳此等四犯平日克暴貪戾蔑視憲章犯罪至此已該減性雖有准贖之例終係死數之人及照各該有司地方有等丁多財富挾衆行克欺打良善把持官府攬奪行市厚取債利侵奪平人產業強擄欠戶妻女豪民及竊盜俱係梗化為惡之人合無

乞勅該部計議通行內外大小問刑衙門今後但有問該准贖死罪囚犯除文武職官監生旗軍校尉勇士力士天文生等項仍照見行事例發落其餘吏民舍餘匠竈僧道樂工人等一應准贖斬絞死罪及豪民犯該流罪竊盜犯該徒罪俱各免其做工運炭納米擺站等項悉發本犯原籍附近衛分充軍一年之內奚止數千數載之間收集多矣足兵之道此其大端也

前件看得御史文貴要將犯該准贖斬絞囚犯除  
文武職官監生旗軍校尉勇士力士天文生等  
項仍照見行事例發落其餘吏民舍餘匠竈僧  
道樂工人等及豪民欺打良善把持官府撓奪  
市利侵占田產強奪妻女犯罪至流者竊盜得  
財犯罪至徒者俱免做工運炭納米擺站等項  
悉發原籍附近衛分充軍蓋以兵備多缺欲以  
此等囚犯填實軍伍也切惟兵戎之備固當究

心然祖宗之法尤當慎守我太祖高皇帝酌古  
準今制為律書輕重適中度越前代其後以死  
刑條目頗多又定為真犯雜犯之等真犯以時  
處決雜犯照例收贖經今百有餘年罔不稱便  
今要將吏民人等有犯前項斬絞罪名及豪民  
竊盜有犯前罪至徒流者俱發附近衛分充軍  
非惟人情驚駭亦於舊制有違不若照舊為便  
一改遷民以助兵食臣聞保邦大要以兵為先守國

良規以食為本查得見行事例凡民人誣告十人以上者發口外為民舍人妄爭嫡庶官職侵奪卑幼產業發原籍為民臣於成化二十年蒙先帝差徃口北巡按到於保安州查得彼處自景泰年間以來遷民四百有奇止有三戶見在其餘俱各隨到隨逃其舍人發回原籍者又百中無一而去是徒有遷發之名而無遷發之實也切詳此等四犯刁詐險惡或誣陷良善或殘害宗枝罪惡深重實

當遷徙但多顧戀鄉土不肯遠離潛栖故廬不敢  
顯出官府不得其用本犯不安其生兩無益也合  
無乞勅該部計議通行內外問刑衙門今後問有  
民人誣奏十人以上該發口外為民舍人妄爭嫡  
庶官職侵奪卑幼產業該發原籍為民者俱各免  
其遷徙就發本處附近衛分充軍督令屯田辦納  
子粒如此不惟犯人得免遠離鄉土之苦抑且衛  
所小得足食足兵之助

前件看得誣告十人以上及舍人妄爭承襲官職  
侵奪卑幼產業俱係誣陷良善殘害宗枝罪惡深  
重之徒誠如御史文貴所言然此等囚犯或發  
口外為民或發原籍當差法如是足矣若發附  
近充軍彼無離鄉去井之苦將益肆其誣陷殘  
害視潛栖故廬不敢出官者不侔矣但發口外  
者隨到隨逃發原籍者百無一去誠有此弊合  
無行移戶部查過年發去人犯姓名轉行原發



官司逐一查究中間在逃並未到者除遇例放  
免外其餘俱要行原籍官司照名拘解前來編  
入圖籍責令里老收管毋致逃竄則前弊可革  
矣

一發礦賊以實邊衛臣聞立法尚嚴為政貴簡切照  
河南永寧盧氏等縣一帶山場各有封閑礦洞往  
往各處人民聚眾盜取查得見行事例偷採銀礦  
囚犯初犯枷號三箇月滿日哨瞭擺站再犯免其

初號不問軍民舍餘係河南籍貫者發遼東邊衛  
浙江者發福建沿海衛分福建者發浙江沿海衛  
所各充軍家小隨住切詳此等囚犯結黨聚眾玩  
法為非其初犯問發哨瞭撮站之人往往逃回又  
行恣肆侵盜雖經再獲原無刺字之律俱各變易  
姓名更改鄉貫無所查對是終無充軍之日也即  
今前項山洞礦賊又復滋蔓若不量為處置恐後  
糾聚日眾不無貽患地方合無乞勅該部計議今

後但有拏獲礦賊不分初犯再犯免其枷號徑解  
原擬都司衛所充軍庶使賊徒不遂變詐之謀邊  
衛小得填實之助

前件查得先該巡視河南戶部左侍郎原傑奏稱  
軍民偷採銀礦初犯枷號發落再犯發邊衛充  
軍已經通行遵守去後近年以來河南浙江福  
建有等奸頑之徒嗜利玩法往往聚集兇徒少  
者二三百人多者七八百人強採銀礦甚者憑

據險拒敵官軍搔擾地方訪得先年處州葉宗  
留亦因聚眾採礦馴至攻劫府縣況河南等處  
連年飢饉人民流亡者多誠恐屯聚山谷採礦  
圖利漸生厲階御史文貴所言誠為有理合無  
依其所奏通行各該布政司等衙門今後但有  
糾聚兇頑盜採銀礦百十為羣者不分初犯再  
犯免其枷號徑發原擬地方充軍若有逃回潛  
住者許令自首仍發原衛着役不首者着該管

地方里老緝拏送官照依兵部見行事例枷號  
三箇月滿日改發極邊衛分充軍里老隱情不  
首者一體治罪如此雖未能足兵亦可以懲惡  
矣

椒邱文集卷三十二